

Bilten

Maj 2022.
Izdanje br. 33



Općinski sud u Sarajevu
Општински суд у Сарајеву
Sarajevo Municipal Court

Općinskog suda u Sarajevu



U sarajevskom Općinskom sudu održan sastanak sa Erikom Larsonom, savjetnikom za borbu protiv korupcije

Strana 2



Oštrija kaznena politika rezultirat će povećanju sigurnosti svih učesnika u saobraćaju _____ *Strana 3*



Unapređenje radnih procesa izvršnih odjeljenja sudova kroz saradnju VSTV BiH i Agencije za izvršenje Švedske _____ *Strana 5*



▲ Detalji sa održanog sastanka

U sarajevskom Općinskom sudu održan sastanak sa Erikom Larsonom, savjetnikom za borbu protiv korupcije u Uredu za borbu protiv korupcije u Kantonu Sarajevo

Erik Larson iz Američke ambasade u BiH, savjetnik za borbu protiv korupcije u Uredu za borbu protiv korupcije i upravljanje kvalitetom u KS te Erduan Kafedžić, šef Ureda za borbu protiv korupcije i upravljanje kvalitetom KS, posjetili su 12. januara 2022. godine Općinski sud u Sarajevu te se tom prilikom sastali sa Janjom Jovanović, predsjednicom suda.

Predsjednica Jovanović je goste ukratko upoznala sa radom Općinskog suda i problemima sa kojima se susreće, naročito u pogledu nedostatka ljudskih i materijalnih resursa za implementaciju novih propisa koje donosi zakonodavna vlast, a bez prethodno provedene finansijske analize o potrebi materijalnih sredstava i ljudskih resursa za njihovu implementaciju.

Tokom sastanka se govorilo i o velikom broju komunalnih predme-

ta koji predstavljaju ozbiljan problem Općinskom sudu u Sarajevu, naročito zbog činjenice da javna komunalna preduzeća u kratkom vremenskom periodu dostave i do 150.000 prijedloga. *“Ovaj sud treba da se bavi rješavanjem strukturnih predmeta kojih ima svega oko 40.000, ali Sud komunalna preduzeća svakodnevno dostavljaju nove prijedloge koje se nakon određenog vremena povlače jer građani u međuvremenu plate svoj dug”* zaključila je predsjednica Jovanović.

Shodno navedenom, predsjednica je zamolila g. Larsona za pomoć i podršku kako bi se komunalni predmeti izmjestili iz suda te kako bi se konačno sud bavio isključivo strukturnim predmetima, a za šta je potrebno izmijeniti zakone kako bi se izvršnim postupkom počeli baviti privatni sudskih izvršitelji kao što je to praksa u zemljama okruženja.

Gospodin Larson je, nakon što je naglasio da je u potpunosti shvatio ovaj problem Suda, zaključio da će zatražiti stav Vlade KS o ovom pitanju.

Gospodin Kafedžić je istakao da je saradnja sa Općinskim sudom u Sarajevu na zadovoljavajućem nivou te posebno zahvalio predsjednici na blagovremenom odgovoru na sve upite ovog Ureda.

Na kraju sastanka, gospodin Larson zahvalio se predsjednici Jovanović na odvojenom vremenu, te dodao da su Sjedinjene Američke Države veliki prijatelj Bosne i Hercegovine i da BiH može računati na svaki oblik pomoći i podrške. On je istakao kako se nada da će ovaj sastanak biti jedan u nizu te da će se saradnja sarajevskog Općinskog suda sa Uredom za borbu protiv korupcije i u budućnosti nastaviti u pozitivnom smjeru. ■

Oštrija kaznena politika rezultirat će povećanju sigurnosti svih učesnika u saobraćaju

Sastanak Janje Jovanović, predsjednice Općinskog suda u Sarajevu sa predstavnicima MUP-a KS održan je u Kabinetu predsjednice 09.12.2021. godine, a na kojem se, između ostalog, najviše govorilo o sigurnosti u saobraćaju na području Kantona Sarajevo. Tom prilikom je konstatovano da je u posljednje vrijeme evidentiran veliki broj prekršaja iz oblasti Zakona o bezbjednosti saobraćaja na putevima u BiH. Veliki broj učesnika u saobraćaju bez položenog vozačkog ispita, lica koja upravljaju vozilima pod dejstvom alkohola ili droga te višestruki povratnici svakodnevno predstavljaju opasnost po sigurnost svih drugih učesnika u saobraćaju. Jedna od tema sastanka bilo je i vraćanje na dalju nadležnost MUP-u



▲ Detalji sa održanog sastanka



KS predmeta koji su oduzeti u krivičnim postupcima pravomoćno okončanim pred ovim sudom. Dogovoreno je da se svi predmeti koje je oduzelo ovo ministarstvo u postupku, uz zapisnik istom vrate na dalje postupanje, a u skladu sa pravomoćnom odlukom suda.

Na kraju sastanka je zaključeno da je za poboljšanje situacije u Kantonu Sarajevo, po pitanju saobraćaja, ključan brz i efikasan rad ne samo ovlaštenih lica MUP-a, nego i Suda, radi čega je neophodno vršiti

kontinuiranu analizu rada, a kako bi se mogle blagovremeno poduzeti odgovarajuće mjere i radnje na poboljšanju cjelokupne sigurnosne situacije u saobraćaju. Adekvatne zakonske kazne svakako znatno mogu doprinijeti smanjenju broja prekršaja naročito kada je riječ o višestrukim povratnicima.

Posebno je naglašeno da je hitno potrebno pristupiti izmjenama i dopunama Zakona o osnovama bezbjednosti saobraćaja na putevima u BiH kao i Zakona o prekršajima FBiH, a o čemu je sud već pisao nadležnim ministarstvima, a o istom su upoznati i MUP KS i VSTV BiH.

Ispred MUP-a Kantona Sarajevo sastanku su prisustvovali Nusret Selimović, policijski komesar, Džafer Hrvat, načelnik sektora uniformisane policije te Ivica Buzuk, načelnik sektora kriminalističke policije, dok su osim predsjednice suda sastanku prisustvovala i sudija Jasmina Alibašić, predsjednica Prekršajnog odjeljenja sarajevskog Općinskog suda te Sumeja Buko, šef Kabineta predsjednice suda. ■



Održan sastanak sudija krivičnih odjeljenja sarajevskog Kantonalnog i Općinskog suda

Uz podršku USAID-ovog projekta Pravosuđe protiv korupcije (Projekt), 2.12.2021.g., održan je sastanak između sudija krivičnih odjeljenja Kantonalnog i Općinskog suda u Sarajevu na temu unaprjeđenja rada na predmetima visokog nivoa korupcije i organizovanog kriminala (VNKOK). Sastanku su prisustvovali: sudije Kantonalnog suda u Sarajevu – Adisa Zahiragić (predsjednica krivičnog odjeljenja), Sanela Rondić, Melika Murtezić, Elvira Begović, te sudije Općinskog suda u Sarajevu – Tanja Curović (predsjednica Krivičnog odjeljenja), Ajla Papović Mujan, Srđan Skoko, Tin Begtašević i Jasmina Szdovski.

Na početku sastanka predstavnici Projekta su dali kratki prikaz aktivnosti podrške Projekta partnerskim sudovima u periodu decembar 2021. – septembar 2022. godine i naglasili važnost povratnih informacija od partnerskih institucija o rezultatima te podrške, kao i o izazovima s kojima se susreću sudije u radu na VNKOK predmetima. Takođe, učesnici su upoznati sa činjenicom da je veliki broj preporuka

za unaprjeđenjem rada na predmetima VNKOK uključenih u projektnu analizu, uvršteno u Reformski program koji je usvojilo Visoko sudsko i tužilačko vijeće (VSTV) u maju 2021. godine. Ove analize su upravo rezultat konsultacija sa profesionalnom zajednicom, prvenstveno sudijama i tužiocima koji rade na ovim predmetima.

Iskustva sudova u implementaciji aktivnosti podrške Projekta

U nastavku sastanka, svoja iskustva u radu sa Projektom izložile su predsjednice krivičnih odjeljenja i sudije Kantonalnog i Općinskog suda u Sarajevu:

- Istaknuto je da su iskustva oba suda veoma pozitivna, kao i da je rad sa Projektom dao jedno drugačije iskustvo, posebno imajući u vidu pokazano razumijevanje i spremnost Projekta da prati potrebe sudova, što obuhvata i pomoć koju je Projekat u prethodnom periodu pružio kako bi se poboljšala tehnička opremlje-

nost sudova. Kao rezultat ove podrške opremljena je dodatna prostorija sudnice 2 u Kantonalnom sudu Sarajevo. Upravo zahvaljujući ovoj podršci, omogućeni su pretresi u predmetima sa većim brojem optuženih uz poštovanje zaštitnih mjera za sprječavanje pandemije. Također, istaknuta je potreba za nabavkom dodatnih projektor/grafoskopa za druge sudnice.

- Kao pozitivno iskustvo proisteklo iz saradnje sa Projektom, navedeno je i angažovanje konsultanata koji su sudijama na raspolaganju naročito u pogledu istraživanja sudske prakse, kako domaće tako i međunarodne prakse, što sudije koriste u radi na VNKOK predmetima.
- Izuzetno značajna podrška pružena je kroz organizaciju sastanka predsjednika sudova i predsjednika krivičnih odjeljenja svih partnerskih sudova sa predstavnicima VSTV-a na kojem su predstavnici oba suda uzeli aktivno učešće u razmjeni informacija o ključnim izazovima sa kojima se sudovi suočavaju u radu na predmetima VNKOK.
- Istaknuta je potreba za nastavkom održavanja specijalističkih obuka u kojima bi učestvovao veći broj sudija.
- Pozitivno je ocijenjena aktivnost u okviru koje je inicirana diskusija na temu novih pojava oblika korupcije, posebno zloupotrebe položaja u vezi sa iznuđivanjem seksa sa pozicije moći, kroz podršku izradi stručnog rada na temu rodne predrasude u vezi sa predmetima VNKOK. Naglašeno je da je važno da se ohrabruju oštećeni, ali i tužilaštva za prepoznavanje ovih djela. ■



Unapređenje radnih procesa izvršnih odjeljenja sudova kroz saradnju VSTV BiH i Agencije za izvršenje Švedske

Usljed sprog odgovora izvršene i zakonodavne vlasti na svim nivoima u Bosni i Hercegovini na potrebu sveobuhvatne reforme izvršnog postupka shodno preporukama Evropske unije, Visoko sudsko i tužilačko vijeće Bosne i Hercegovine putem saradnje sa partnerima iz Švedske nastoji unaprijediti rad izvršnih odjeljenja sudova.

Izvršna odjeljenja sudova u BiH nemaju ujednačenu metodologiju rada, te postupaju u uslovima ograničenih materijalno finansijskih resursa. Stoga se nameće nužna potreba za unapređenjem radnih procesa i uvođenjem novih radnih metoda, što predstavlja jednu od aktivnosti koju Visoko sudsko i tužilačko vijeće Bosne i Hercegovine realizuje putem projekta Unapređenje efikasnosti sudova i odgovornosti sudija i tužilaca u BiH, uz finansijsku podršku Vlade Švedske i stručnu podršku eksperata Agencije za izvršenje Švedske.

Trenutni načini rada i postojeći radni procesi u sudovima, bili su predmet situacione analize tokom posjeta predstavnika VSTV-a BiH i Agencije za izvršenje Švedske, općinskim sudovima u Sarajevu, Mostaru i Zenici i osnovnim sudovima u Prijedoru i Banjoj Luci. Sastancima su prisustvovali predsjednici sudova, sudije koje postupaju u izvršnim predmetima i sudski izvršitelji. Kako su tokom sastanaka izložili predstavnici sudova, ključni problemi izvršnih referata ogledaju se u velikom broju neriješenih izvršnih predmeta komunalne prirode, nedostatku materijalnih i ljudskih resursa, nedovoljnom broju sudskih izvršitelja i neadekvatnoj obučenosti za rad te nemogućnosti pristupa



▲ Detalji sa održanog sastanka

informacijama o imovini dužnika u svrhu efikasnog provođenja izvršnog postupka.

Uvažavajući iznesene stavove predstavnika sudova te izvršene analize i preporuke Evropske unije, kao primarni cilj projektnih aktivnosti je postavljeno mapiranje ključnih problema u radu izvršnih odjeljenja, te izrada i implementacija preporuka koje će doprinijeti unapređenju radnih procesa izvršnih referata u pilot sudovima i pravosuđu BiH, a za čiju će realizaciju biti odgovorni sudovi i nadležni organi izvršne vlasti.

Kada je riječ o sarajevskom Općinskom sudu, predstavnici ovog suda ističu da je nužno što prije pristupiti izmjenama zakonske regulative kako bi izvršni postupak bio brz i efikasan. Predsjednica Jovanović posebno ističe činjenicu da preko 95% završenih predmeta u građanskim postupcima pređe u izvršni postupak, a što znači da stranke koje su izgubile spor i kojima je nametnuta

neka obaveza proizašla iz tog spora, istu neće da izmire u paricionom roku nego se isto namiruje prinudnim putem u izvršnom postupku. Posebno je istaknut problem komunalnih predmeta gdje je sarajevski Općinski sud u saradnji sa Visokim sudskim i tužilačkim vijećem BiH poduzeo sve radnje kako bi se ta vrsta predmeta rješavala brže. Međutim, broj prijedloga koje JKP dostave sudu elektronskim putem Sud nije u mogućnosti završiti uz postojeće ljudske kapacitete. Radi se o predmetima koji se odnose na prinudnu naplatu pruženih komunalnih usluga i isti se ne mogu smatrati sudskim predmetima, a radi čega je potrebno da VSTV BiH uključi izvršnu i zakonodavnu vlast te da se ovi predmeti izmijeste iz sudova i da se naplatom pruženih komunalnih usluga bavi, prije svega, JKP ili privatni izvršitelji, što je slučaj zemalja u okruženju. Cilj Općinskog suda u Sarajevu je da se kroz navedeni Projekat to i postigne. ■

Predsjednica Općinskog suda Sarajevo Janja Jovanović za "Avaz": Dnevno smo odgađali i po 60 ročišta

Predsjednica Općinskog suda u Sarajevu Janja Jovanović u intervjuu za „Dnevni avaz“ govorila je, između ostalog, o komunalnim predmetima u Općinskom sudu, u kojima, kako kaže, otkad je na ovoj poziciji, nije vidjela da su napravili pozitivni korak.

Broj ročišta

- Općinski sud u Sarajevu je najveći sud u regiji i mi imamo najveći broj predmeta i najviše nosilaca pravosudnih funkcija. Problemi izazvani pandemijom prisutni su u ovom sudu, kao i u svim ostalim institucijama. Veliki broj uposlenika je bio odsutan zbog izolacije i samoizolacije ili zato što su bili bolesni. Za to vrijeme, kad su uposlenici odsutni, radi se manji broj predmeta, samim tim i stranke su nezadovoljne, jer odluku koju su očekivali nisu dobili kad su smatrali da je trebaju dobiti.

Kako ste organizirali rad u vrijeme pandemije?

- Tokom cijele pandemije Sud ni u jednom trenutku nije bio zatvoren niti je došlo do obustave rada. Zbog velikog broja uposlenika, ali i zbog preporuka kriznih štabova te mjera koje su se donosile, rad je bio organiziran u smjenama. Svako sudsko odjeljenje je radilo. Mnogo se vodilo računa o poštivanju svih epidemioloških mjera (obavezno nošenje maski, dezinfekcija površina, postavljanje zaštitnih ograda od pleksiglasa u sudnicama, kancelarijama i pisarnicama).

Postoji li velika razlika u broju održanih ročišta sada i u vrijeme prije pandemije?

- Postoji. Zbog velikog broja odsutnih uposlenika Suda i nosilaca pravosudnih funkcija, ali i administrativnog osoblja, svakodnevno se odlagao veliki broj ročišta. Međutim, moram naglasiti da se veliki broj ročišta odlagao i na zahtjev stranaka u postupku (advokata, punomoćnika stranaka) koji su bili spriječeni pristupiti ročištu zbog toga što su bili zaraženi koronavirusom ili su bili u kontaktu sa zaraženom osobom. Sud je dnevno odgađao i po 60 ročišta. To su enormni troškovi za budžet Kantona Sarajevo, za stranke u postupku, a za Sud predstavlja dodatno opterećenje, jer se sva ta ročišta ponovo moraju zakazivati.

To dovodi do dužeg trajanja postupka, kao i do nezadovoljstva stranaka u postupku jer sudski procesi duže traju.

Kada je riječ o rješavanju predmeta tokom pandemije, koji su predmeti smatrani prioritetnima?

- Kad je Sud donosio krizne planove i naredbe, a u skladu s preporukama nadležnih kriznih štabova, Vlade Kantona Sarajevo i VSTV-a BiH, tačno je određeno koji predmeti su, prema ocjeni uređujućih


sudija, neodložni. Radilo se o pravnim predmetima, predmetima u kojima prijete zastara, mjerama osiguranja i drugim predmetima koji ne trpe odlaganje. Međutim, i u takvim, neodložnim predmetima povremeno je moralo doći do odlaganja ročišta zbog toga jer su sudije ili advokati/punomoćnici/stranke u postupku bili pozitivni na koronavirus.

Koliko „Vodovod i kanalizacija“, „Rad“, „Toplane Sarajevo“ i „Komunalac“ potražuju novca od građana zbog neizmirenih računa?

- Općinski sud u Sarajevu, koji, prema nadležnosti, pokriva cijeli KS, stalno se susreće s velikim brojem komunalnih predmeta. To su predmeti gdje građani nisu platili usluge pružene od ViK-a,

„Rada“ ili „Toplana“. Na kraju 2020. godine imali smo više od milion neriješenih komunalnih predmeta. Moram konstatirati da je to enorman broj. Naime, prema posljednjem nezvaničnom popisu stanovništva iz 2013. godine, u Kantonu Sarajevo bilo je oko 149.000 domaćinstava ili 210.000 stambenih jedinica.

Ako se to uporedi s brojem podnesenih prijedloga od komunalnih preduzeća, onda se može zaključiti





▲ Predsjednica Jovanović: Javna preduzeća se moraju pozabaviti naplatom pruženih usluga

da protiv svakog stanovnika ovog grada imamo oko četiri prijedloga za izvršenje. Na osnovu ove statistike vidi se da se ne može desiti da protiv svakog građanina imamo pet prijedloga za neplaćenu pruženu uslugu. Zapravo, protiv određene grupe pravnih i fizičkih lica ima više prijedloga za izvršenje. Sud u tom pravcu, a na prijedlog javnih komunalnih preduzeća, spaja sve prijedloge te kada se odredi izvršenje za namirenje novčanog potraživanja, onda je to sav dug koji taj građanin ili to pravno lice ima prema tom određenom javnom preduzeću, ali bez obzira na sve to, ovo je jedan veliki broj prijedloga. Nadležnost ovog suda je da rješava strukturne predmete (krivične, parnične, vanparnične, prekršajne...), a ne da resurse trošimo za naplatu

usluga koje građanima pružaju komunalna preduzeća. To nije funkcija Suda. Mi bismo trebali biti posljednja adresa kojoj bi se obratila komunalna preduzeća nakon što iskoriste sve druge mehanizme naplate svojih potraživanja od dužnika prije nego što pokrenu tužbu. Kod javnih preduzeća i komunalnih prijedloga nema ništa sporno da se sudi, to je samo naplata potraživanja u određenom predmetu. Međutim, s obzirom na to da je kod nas prisutna finansijska nedisciplina, da određeni broj fizičkih i pravnih lica očigledno ne izmiruje pravovremeno svoje dugove prema komunalnim preduzećima, proizvod toga su komunalni predmeti kojima je ovaj sud zatrpan. Ovakva situacija svakako nije u interesu ni javnih komunalnih predu-

zeća ni Kantona Sarajevo, a ni Općinskog suda. Kanton svake godine ima velike materijalne troškove za ljudske resurse i materijalna sredstva s ciljem smanjenja broja komunalnih predmeta. Međutim, koliko god da se tokom godine riješi komunalnih predmeta, krajem godine, redovno, pristignu nove tužbe. Svake godine na tu temu razgovaram s predstavnicima Kantona i Vlade KS, ali do sada nismo uspjeli naći pravo rješenje kako da se ovi predmeti izmjestu iz Suda - da se iznađe način njihovog rješavanja. Javna preduzeća se moraju pozabaviti naplatom pruženih usluga, a građani moraju znati da za svaku pruženu uslugu moraju izmiriti određeni iznos novčanog potraživanja. Bitno je istaći da komunalna preduzeća putem sudova potražuju

minorna sredstva, npr. tuže građanina za neplaćene iznose ispod 10 KM, ali cijena za naplatu tog minornog potraživanja je mnogo veća nego što sam iznos potraživanja košta. Ali i taj minorni iznos građanin, kao korisnik usluge, mora platiti, ali najčešće građani i nemaju saznanje za dug, dok ne dobiju rješenje Suda. Građani moraju znati da za svaki neplaćeni iznos komunalnih usluga, kada ono dođe do Suda, moraju platiti i sudsku taksu u visini od 20 KM, a to su dodatni troškovi za građane.

Možete li nam reći koliko košta formiranje jednog ovakvog predmeta te koliko komunalna preduzeća trenutno potražuju novčanih sredstava od građana, a po osnovu neplaćenih računa?

- Formiranje predmeta, uključujući materijalna sredstva, usluge dobavljača, kurira i sve ono što čini suštinu i vrijednost jednog predmeta, iznosi oko 75 KM. Toliko Kanton košta jedan prijedlog za izvršenje. Koliki je iznos potraživanja koji komunalna preduzeća trenutno potražuju, mi o tome ne vodimo statistiku. To nije stvar ovog suda.

Komunalni predmeti

Osım problema u vezi s komunalnim preduzećima, s kojim se problemima još susreće ovaj sud?

- Ti komunalni predmeti čine 95,66 posto predmeta Općinskog suda. Ostali predmeti su strukturni, a to su: parnični, radni sporovi, porodični, krivični, vanparnica, registar, prekršaji i tu uvijek imamo oko 40.000 do 50.000 neriješenih



predmeta. To je velika cifra, ali kada se taj broj podijeli po nosiocima pravosudne funkcije, ovaj sud treba imati oko 131 nosioca pravosudne funkcije, onda to nije zabrinjavajuća cifra. Prema sistematizaciji, imamo optimalan broj predviđenih nosilaca pravosudne funkcije, ali nikada nemamo popunjen broj sudija koji nam nedostaju. Ovo je jedan veliki sud. Fluktuacija je velika. Nosioци pravosudnih funkcija stalno prelaze s ovog suda na druge pozicije, a njihovi referati ostaju upražnjeni.


- Posebno naglašavam da Sud čeka na izbor sedam sudija već duži period. Prošle godine smo čekali više od godinu na izbor 12 sudija. Kada se sve to pretvori u broj predmeta, da smo imali pravovremeno izbor tolikog broja nosilaca pravosudnih funkcija, onda bi broj neriješenih predmeta sada bio znatno manji... Po pitanju pravo-

vremenog izbora nosilaca pravosudnih funkcija, pisali smo mnogo puta VSTV-u BiH. Urgirali smo da se izbor sudija ovog suda ubrza jer spor proces imenovanja, odnosno nedostatak sudija znatno utječe na rezultat rada ovog suda

Nedovoljno uposlenika

Imate li dovoljno uposlenika koji rade na predmetima koji guše Sud?

- Mi nemamo dovoljno uposlenika da rade na ovim predmetima. Općinski sud je uređen sud i sve te predmete smo izmjestili u jedno odjeljenje na Grbavici koje se samo bavi određivanjem izvršenja za naplatu komunalnih usluga. Sve radimo automatskom obradom podataka, ali da bi se neko bavio ovolikom masom predmeta, naravno da mora biti više uposlenika, da bismo bili ažurni 100 posto. Ponovo naglašavam da javna komunalna preduzeća moraju ažurirati svoje baze podataka, građani moraju plaćati iznose za isporučene usluge, a oni građani koji su u stanju socijalne potrebe te iznose treba neko subvencionirati i jedino u tom slučaju broj predmeta bi bio smanjen. ■





▲ Novoimenovane sudije na sastanku sa predsjednicom suda

VSTV BiH imenovao nosioce pravosudnih funkcija Općinskog suda u Sarajevu

Visoko sudsko i tužilačko vijeće Bosne i Hercegovine (VSTV BiH) je na sjednici održanoj 23.03.2022. godine u Sarajevu donijelo odluku o imenovanju nosilaca pravosudnih funkcija u Bosni i Hercegovini. Tom prilikom imenovane su i sudije Općinskog suda u Sarajevu i to:

- Mirela Karović;
- Maja Jovičić Breko;
- Jasmina Skopljak;
- Jovana Vidić;
- Ana Dragičević;
- Milislav Đurić;

Sastanak sa novoimenovanim sudijama održan je 06.04.2022. godine u Multimedijalnoj sali suda. Tom prilikom prisutnima se obratila Janja Jovanović, predsjednica suda,

koja im je poželjela dobrodošlicu u sud i sreću u budućem radu. Ukratko ih je informisala o organizaciji rada suda i sudskih odjeljenja te ih obavijestila na kojim će referatima raditi.

Novoimenovani nosioci pravosudnih funkcija stupili su na dužnost 11.04.2022. godine.



Pri donošenju Odluke o imenovanju, VSTV BiH je uzeo u obzir kriterije poput: stručnog znanja, radnog iskustva i radnih rezultata; stručne sposobnosti zasnovane na dosadašnjim rezultatima u karijeri; sposobnosti da nepristrasno, savjesno, marljivo, odlučno i odgovorno obnaša dužnosti u okviru funkcije za koju se prijavljuje; odnosa sa radnim kolegama, ponašanja van posla, profesionalne nepristranosti i ugleda te iskustva na rukovodećim poslovima.

Pri imenovanju, VSTV BiH primjenjuje odgovarajuće ustavne odredbe kojima se uređuju jednaka prava i zastupljenost konstitutivnih naroda i ostalih, te poštuje ravnomjernu zastupljenost spolova. ■

Sa početkom 2022. godine uveden je novi sistem rada sudskih izvršitelja

Sudski izvršitelji su početkom 2022. godine raspoređeni u tim sa izvršnim sudijom koji će pratiti njihov rad i postupanje po nalogu uređujućeg sudije. Sudski izvršitelji su, nakon što su obučeni za rad u CMS-u, prešli na novi sistem rada. Sve zaključke sa tačnim nalogom sudije sudski izvršitelj dobija putem CMS-a te potpune i tačne zapisnike dostavlja sudiji, u čijem je timu.

Izvršne sudije su učestvovala sa predsjednicom Suda i sudskom upravom u kreiranju novog sistema rada nakon što su ocijenili da će na takav način dobivati brže informacije i izvještaje sa terena. Izvršne sudije su kreirale sve vrste zapisnika u kojima je tačno naznačeno šta zapisnik mora da sadrži da bi predstavljao zakonit dokaz za donošenje odluke. Na ovakav način će se unaprijediti rad sudskih izvršitelja i ubrzati rješavanje izvršnih predmeta.


Na sastanku koji je održan 26.04.2022. godine, a na kojem su sudski izvršitelji razmatrali izvještaj o radu za prethodnu godinu i izvještaj o radu za prva tri mjeseca tekuće godine, prisustvovala su sudije Izvršnog odjeljenja sudija Balić Amela, predsjednica Izvršnog odjeljenja, sudije Nenad Banduka i Dragan Mirjanić, predsjednica Suda Jasnja Jovanović te šef sudske uprave Mirzet Sudžuka.

Boris Stojaković, šef Odsjeka sudskih izvršitelja, predstavio je izvještaj o radu za 2021. godinu i prva tri mjeseca tekuće godine, te de-



▲ Detalji sa održanog sastanka

taljno izvršio analizu rada Odsjeka sudskih izvršitelja, sa posebnim fokusom na analizu rada Odsjeka za tri mjeseca 2022. godine nakon uvedenog novog sistema rada te napravio komparaciju sa istim periodom prethodne godine. Na osnovu iznesenih brojčanih pokazatelja zaključeno je da je evidentan znatan porast riješenih naloga i novi sistem rada je ocijenjen kao pozitivan.



Analizom godišnjeg izvještaja rada suda, kao i rada Izvršnog odjeljenja i sudskih izvršitelja, utvrđeno je da ostvarena norma sudskih izvršitelja nije zadovoljavajuća te da pojedini sudski izvršitelji nisu ostvarili ni prosjek norme odjeljenja, a što je u konačnom utjecalo na ostvarenje rezultata sudija Izvršnog odjeljenja koje su na sastanku Izvršnog odjeljenja iznijele mišljenje na temu unapređenja rada ovog Odsjeka, ističući da se svaki sudski izvršitelj u svakom momen-

tu može konsultovati sa sudijom sa kojim je u timu, a u cilju prevazilaženja eventualnih smetnji ili problema u provođenju izvršenja. Zaključeno je da je sistem rada koji je uveden efikasniji te da sudija može kroz CMS pratiti rad sudskog izvršitelja sa kojim je u timu. Osim toga, naglašeno je da su sa sudijama i sudski izvršitelji učestvovali u kreiranju zapisnika koji mora sadržavati sve elemente propisane Zakonom i koji kao takav može služiti kao validan dokaz u postupku odlučivanja u konkretnom predmetu. Izvještaji, kao i svi ostali analitički podaci o efikasnosti rada sudskih izvršitelja i Odsjeka kao cjeline, će biti pokazatelj stvarnog angažmana svakog sudskog izvršitelja pojedinačno.

Strategija predsjednice suda i sudija Izvršnog odjeljenja je da se sa izmjenom sistematizacije unaprijedi rad Odsjeka sa stručnog aspekta te da se postepeno vrši izmjena na način da sudski izvršitelji budu sa visokom stručnom i da rade u timu sa sudijom kroz CMS i dio stručnih poslova, a sve u cilju bržeg i efikasnijeg rješavanja izvršnih predmeta. ■

Godišnji izvještaj o radu sudskih odjeljenja Općinskog suda u Sarajevu tokom 2021. godine

U Općinskom sudu u Sarajevu na početku 2021. godine bilo je 1.105.695 predmeta. Tokom godine zaprimljeno je 235.348 novih predmeta te je u radu ukupno bilo 1.341.043 neriješenih predmeta. Od tog broja riješeno je 207.648 predmeta, dok je neriješenih ostalo

1.133.395 predmeta. Od tog broja, čak 1.084.575 predmeta ili 95,69% su komunalni predmeti dok je samo 48.820 ili 4,31% strukturnih predmeta.

Sud je ostvario normu u visini od 135,64%, dok kvalitet rada iznosi 90,89%. ■

Parnično odjeljenje (Ostvarena norma 97,83%)

Izvještaj o radu Parničnog odjeljenja za 2021. godinu sadrži podatke o radu odjeljenja sa aspekta broja predmeta koji su bili u radu u navedenom izvještajnom periodu, realizacije plana rješavanja predmeta i aktivnosti u okviru projekta Unapređenje efikasnosti pravosuđa II. U izvještajnom periodu 01.01.2021. do 31.12.2021. godine u Parničnom odjeljenju do jula 2021. godine je radilo 14 sudija, a od jula na ovom je radilo 15 sudija zaduženih sa 7.259 predmeta od čega je 3.786 preneseno iz prethodne godine dok je u 2021. godini primljeno 3.468 predmeta.

U toku godine sudije ovog odjela su riješile 3.369 predmeta te su sve sudije (osim jedne koja je duže od šest mjeseci bila odsutna radi porodijskog bolovanja) savladale priliv predmeta u 2021. godini.

Ukoliko uporedimo rezultate u odnosu na prethodnu godinu, vidljivo je da su sudije ovog odjela u 2021. godini uspjele riješiti 643 predmeta više u odnosu na 2020. godine ili cca 23%. Na dan 31.12.2021. u radu je ostalo 3.885 predmeta.

Analizirajući broj predmeta koji su bili u radu u ovom odjeljenju tokom izvještajnog perioda, u odnosu na broj predmeta koji su bili u radu u 2020. godini, uočava se blago povećan priliv predmeta u prošloj godini za 117 predmeta.

Parnično odjeljenje je u protekloj godini od ukupnog broja riješenih predmeta ostvarilo normu od 97,83%,




▲ Šalter-sala suda

a što je u odnosu na 2020. godinu, kada je ostvarena norma od 70,19 %, više za cca 27,64%. Kada je riječ o Planu rješavanja predmeta u 2021. godini isti je realizovan u procentu od 79,90% a 83,52% (u odnosu na sudije koje su ocjenjivane u izvještajnom periodu, odnosno na sudije koje su radile više od šest mjeseci u toku 2021. godine) što u odnosu na godinu ranije, kada je Plan realizovan u procentu od 60,12%, predstavlja povećanje za cca 23,40%.

Analiza kvalitete rada pokazuje da je u izvještajnom periodu sa Kantonalnog suda u Sarajevu vraćeno ukupno 1.121 predmeta i to potvrđenih ukupno 841 odluka, 114 preinačenih, 145 ukinutih i djelimično ukinutih 20 te je procenat ukupno vraćenih odluka u odnosu na ukinute i djelimično ukinute odluke, visokih 86,47%.

Sudije Parničnog odjela su uvijek voljne da ulažu dodatne napore u unapređenje efikasnosti pravosuđa, stoga sudije aktivno učestvuju u Projektu unapređenja efikasnosti sudova i odgovornosti sudija i tužilaca-ICEA u saradnji sa sudskom administracijom Švedske, dok su i dalje u toku redovne aktivnosti na praćenju i održavanju pozitivnih rezultata Projekta koji je ovaj odjel uspješno okončao u saradnji sa Okružnim sudom u Amsterdamu sa posebnim naglaskom na primjenu projektnih dokumenata i ostvareni nivo saradnje sa Kantonalnim sudom.



Porodično odjeljenje (Ostvarena norma 111,76%)

U okviru Porodičnog odjeljenja Općinskog suda u Sarajevu u toku 2021. godine bilo je raspoređeno četvero sudija. Na osnovu izvještajnih podataka ovo odjeljenje je i u protekloj godini, radom i zalaganjem sudija ovog odjeljenja, postiglo dobre rezultate i ostvarilo napredak u svom radu. Tokom izvještajnog perioda zaprimljena su 892 predmeta. S obzirom da je broj nezavršenih predmeta u 2020. godini iznosio 715, ukupno je u radu bilo 1.607 predmeta. Od ukupnog broja predmeta u radu, u 2021. godini riješeno je 940, dok je 667 predmeta ostalo neriješeno. Navedeni podaci ukazuju da su sudije ovog odjeljenja, kao i ranijih godina, uspjele savladati priliv i smanjiti broj neriješenih predmeta na kraju godine.

Uporednom analizom je utvrđeno da je priliv u 2021. godini, koji je iznosio 940 predmeta, u odnosu na 2020. godinu, u kojoj je zaprimljen 851 predmet, veći za 41 novozaprimljeni predmet. Značajno je istaći da je u

toku 2021. godine odjeljenje veći period radilo sa četvero sudija, a u 2020. godini bilo je pet sudija na odjeljenju, a da je ipak savladalo priliv i smanjilo broj neriješenih predmeta na kraju godine. Rezultati odjeljenja bi bili i znatno bolji, ali je početak godine obilježen otežanim radom i otkazivanjem velikog broja ročišta zbog COVID-a. I pored toga, dobrom organizacijom i zalaganjem sudija Porodičnog odjeljenja ostvareni su dobri rezultati tako da stranke nisu bile oštećene zbog eventualnog dugog trajanja sudskog postupka. U prilog tome govori i činjenica da u 2021. godini nije bilo pritužbi građana na rad ovog odjeljenja.

U toku prošle godine nastavilo se sa presigniranjem predmeta sporazumnih razvoda i tužbi bez djece Parničnom i Radom odjeljenju ovog suda.

Kao i prethodnih godina, Porodično odjeljenje je i u 2021. godini prebacilo zadatu normu i ona iznosi 111,76%. Ova norma ukazuje na kontinuirani rast efikasnosti ovog odjeljenja.

Sudije Porodičnog odjeljenja su u svom radu posebnu pažnju posvetile rješavanju najstarijih predmeta. Realizacija Plana za 2021. godinu iznosi 89,25%.

Značajan podatak u analizi rada odjeljenja jeste i činjenica da je ovo odjeljenje od ukupnog broja završenih predmeta njih 75,34% završilo meritumom.

Kvalitet Porodičnog odjeljenja u 2021. godini – Ukupno bilo 26,59% ukinutih odluka. Ukupno je vraćeno 126 odluka od kojih je potvrđenih 81, ukinutih 32, tri djelimično ukinute i preinačenih 10.

Izvještaj o poštivanju optimalnih i predvidivih rokova ukazuje na poštivanje utvrđenih predvidivih rokova i da dužina trajanja postupka bračnih sporova po tužbi iznosi 319 dana, što je ispod utvrđenog predvidivog roka od 516 dana, a u predmetima izdržavanjem 380. U bračnim sporovima po prijedlogu 133 dana, a što je znatno ispod utvrđenog predvidivog roka

Utvrđeno je da nije bilo opravdanih pritužbi stranaka na rad sudija i na izradu odluka u predviđenom roku.

Odjeljenje za radne sporove (Ostvarena norma 86,71%)

Programom rada Općinskog suda u Sarajevu za 2021. godinu bilo je planirano da 13 sudija Odjeljenja za



radne sporove riješi 2.411 predmeta. Do mjeseca maja 2021. godine na odjeljenju je bilo raspoređeno 13 sudija, nakon čega je taj broj smanjen na 12.

Na početku izvještajnog perioda odjeljenje je imalo 2.351 neriješena predmeta. Tokom godine je savladan priliv od 1.524 predmeta te je riješeno ukupno 2.100 predmeta, što znači da je završeno 576 predmeta više nego što je zaprimljeno. U radu je, dakle, tokom 2021. godine bilo ukupno 3.444 predmeta, što je, poređenja radi, za 1.666 predmet manje u odnosu na 2019. godinu. Odjeljenju za radne sporove je presignirano i ukupno 483 parnična predmeta sa ciljem nivelacije broja otvorenih predmeta po sudijama, a koji predmeti su u izvještajnom periodu uporedo rješavani sa radnim sporovima.

Ostvarena godišnja norma na nivou Odjeljenja iznosi 86,71%.

Iako Odjeljenje za radne sporove nije u cijelosti realizovalo propisanu godišnju normu i upotpunosti ostvarilo ciljeve planirane Programom rada Općinskog suda u Sarajevu za 2021. godinu, postignuti kvantitativni rezultati se mogu smatrati izuzetno uspješnim. Naime, zbog usklađivanja granskih kolektivnih ugovora sa odredbama Zakona o radu („Službene novine F BiH“, broj 26/16) i zauzetih stavova Vrhovnog suda F BiH po spornim pravnim pitanjima, na Odjeljenju za radne sporove je došlo do značajnih promjena u strukturi referata u odnosu na prethodni period, naročito u odnosu na razdoblje do 2019. godine. Konkretno, od 2019. godine prisutna je tendencija značajnog smanjenja priliva predmeta po osnovu novčanih potraživanja, što je u konačnici dovelo do toga da se referati pretežno sastoje od složenih radnih sporova kao što su otkazi, zaštita od diskriminacije i mobinga, poništenje odluka iz konkursne procedure i poništenje odluka iz disciplinskog

postupka. Također, rješavaju se specifični predmeti kolektivnih radnih sporova i štrajka. Radi se o predmetima gdje je za donošenje odluke o tužbenom zahtjevu potrebno analizirati pitanja iz različitih režima radnog odnosa koja su regulisana brojnim zakonima, podzakonskim aktima, kolektivnim ugovorima i opštim internim aktima poslodavca. U pravilu sud odlučuje o više kumulativno postavljenih tužbenih zahtjeva te je zbog obimnog dokaznog postupka nužno održati nekoliko nastavaka glavne rasprave. Navedeno je imalo za posljedicu smanjenu realizaciju norme Odjeljenja za radne sporove koja se bilježi od 2020. godine. Da ostvarena norma ne prikazuje stvarne rezultate odjeljenja govori u prilog i činjenica da je Odjeljenje za radne sporove u izvještajnom periodu donijelo 1.291 presudu, iz čega je vidljivo da su se predmeti, kao i prethodnih godina, gotovo u pravilu rješavali meritornom odlukom.

Plan rješavanja predmeta ostvaren je u procentu od 83,56%, dok je procenat rješavanja najstarijih predmeta iz plana na nivou odjeljenja 73,67%.

Što se tiče kvaliteta odluka, sa Kantonalnog suda u Sarajevu je ukupno vraćeno 1.303 predmeta od čega je potvrđenih 1.030 odluka, 159 preinačenih, 76 ukinutih i 37 djelimično ukinutih odluka. Statistika kvaliteta rada pokazuje da je procenat ukinutih odluka u odnosu na broj potvrđenih/preinačenih samo 7,25%. Odjeljenje za radne sporove je u toku 2021. godine nastavilo saradnju sa Kantonalnim sudom u Sarajevu u cilju ujednačavanja sudske prakse, na čemu se uspješno radi i na redovnim sjednicama odjeljenja.

Privredno odjeljenje (Ostvarena norma 163,46%)

Postupajući u skladu sa odredbom člana 27. stav 3. Zakona o sudovima u Federaciji Bosne i Hercegovine, Privredno odjeljenje ovog suda je u 2021. godini rješavalo predmete privrednih sporova (Ps), stečajnih postupaka (St) i likvidacionih postupaka (L). Na rješavanju ovih predmeta u toku godine radilo je devet sudija.

Na predmetima privrednih sporova radilo je osam sudija, a na predmetima stečajnih postupaka i likvidacionih postupaka radilo je devet sudija.

Odjeljenje je na sva tri referata uspjelo riješiti priliv predmeta te značajno smanjiti ukupan broj neriješenih predmeta na kraju godine.

Prosjek predmeta po referatu za sudije u 2021. godini iznosio je 156 predmeta.

Pregled rješavanja predmeta na Privrednom odjeljenju:

Na referatu privrednih sporova (Ps) na početku 2021. godine bilo je ukupno neriješenih 1.337 predmeta, u toku godine zaprimljeno je 1.121, a riješeno je ukupno 1.287. Na kraju godine ostalo je neriješenih 1.171 predmeta.

Na referatu likvidacije pravnih lica (L) na početku godine bilo je neriješeno 221 predmeta, u toku godine zaprimljeno je 218 predmeta, riješena su 267 predmeta i na kraju godine ostalo je neriješenih 172 predmeta.

Na referatu stečajnih predmeta (St) na početku 2021. godine bilo je 244 neriješena predmeta, u toku godine zaprimljeno je 112, u toku godine riješeno je 136 i na kraju godine ostalo je neriješenih 220 predmeta.

Što se tiče norme odjeljenja koje je propisana Pravilnikom o orijentacionim mjerilima, Odjeljenje je postiglo normu u procentu od 163,46%. Sve sudije su ispunile normu.

Kada je riječ o Planu rješavanja predmeta, sve sudije nisu uspjele ostvariti procenat od 100% isključivo iz razloga što je Corona virus uticao da se veliki broj ročišta odloži, radi bolesti sudija, a i punomoćnika stranaka, što je i opće poznata stvar. Procenat ostvarenoga Plana može se ocijeniti kao zadovoljavajući u ovakvoj situaciji u kojoj se suđenje obavljalo na ovom odjeljenju. U skladu sa Planom rada za 2021. Godinu, u odjeljenju su redovno održavani sastanci na kojima su sudije informisane o rezultatima rada u toku godine,

sudijama je omogućeno da daju prijedloge i da iznose svoja mišljenja o svim bitnim situacijama za rad kako odjeljenja, tako i pojedinačno svakog od sudija. U toku godine nije bilo spornih situacija koje nisu riješene u okviru odjeljenja.

Odjeljenje je preko svog predstavnika uspostavilo redovan kontakt sa sarajevskim Kantonalnim sudom u cilju usaglašavanja sudske prakse, a što se pokazalo veoma korisnim.

Imajući u vidu ovako uspješan rad odjeljenja u 2021. godini, u 2022. cilj treba biti održavanje postignute ažurnosti.

Krivično odjeljenje (Ostvarena norma 116,1%)

U 2021. godini na Krivičnom odjeljenju suda raspoređeno je bilo ukupno 13 sudija.

Krivično odjeljenje je u protekloj godini ostvarilo normu od 116,1%, što je za oko 16% više u odnosu na 2020. godinu kada je norma iznosila 100,26%. Plan rješavanja predmeta u 2021. godini realizovan je u procentu od 97,09 dok je u 2020. taj procenat iznosio 84,33%. Kvalitet rada odjeljenja za proteklu godinu



▲ Ivana Krželj, sudija Privrednog odjeljenja

▲ Damir Batotić,
sudija Krivičnog odjeljenja



iznosi 10,22 % ukinutih odluka, odnosno 89,78% potvrđenih odluka.

Na početku izvještajnog perioda ukupan broj neriješenih predmeta je bio 1.046, a na dan 31.12.2021. godine u radu je ostalo 1.299 predmeta. Analizom protoka predmeta u 2021 godini te uporedbom sa izvještajem iz 2020. godine, evidentan je povećan priliv predmeta po svim fazama jer je u 2020. godini zaprimljeno 6.497 predmeta, a 2021. broj primljenih predmeta je iznosio 8.019.

Osim ovih pokazatelja koji evidentno govore o veoma ažurnom i kvalitetnom radu odjeljenja, tokom prošle godine u radu Krivičnog odjeljenja, shodno važećim pravilima i preporukama, preduzete su sve mjere i aktivnosti na efikasnom vođenju postupaka uprkos veoma nepovoljnoj zdravstveno-epidemiološkoj situaciji koja je otežavala dinamiku rada. Međutim, i pored toga efikasnost i hitnost postupanja u predmetima maksimalnim zalaganjem sudija odjeljenja je ispoštovana, broj riješenih predmeta povećan, a kvalitet poboljšan. Ova konstatacija se ukazuje značajnom tim prije, jer je Krivično odjeljenje, za razliku od 2020. godine, u 2021. godini zaprimilo 1.518 predmeta više te riješilo ukupno 7.766 predmeta.

Posebna pažnja posvećena je postupku prethodnog saslušanja, odnosno kvalitetu optužnica kao preduslovu efikasnijeg suđenja te donošenja na zakonu zasnova-

ne i pravilne odluke. Navedeno je ishodišom činjenicom da je veći broj optužnica vraćan na uređenje i doradu. Krivično odjeljenje je redovno održavalo sastanke sudija na kojim je definisan proces rada, razmatrana pravna pitanja posebno u pravcu ujednačavanja stavova po istim, praćen protok predmeta, vršena nivelacija radi ravnomjerne raspodjele predmeta sudijama, a sve kako bi se postupci proveli što efikasnije, a odluke bile što kvalitetnije.

Na sastancima odjeljenja raspravljalo se o tekućim pitanjima, zauzet je jedinstven stav za upućivanje inicijative za preispitivanje kriterija za ocjenu rada sudija i stručnih saradnika, korigovanju Plana rješavanja starih predmeta prema VSTV-u BiH, raspravljalo se o preduzimanju aktivnosti ka efikasnijem i prioritetnijem rješavanju koruptivnih predmeta, pri čemu su sve sudije bile saglasne da uz ostale zakonom određene prioritete, ulože dodatni napor u borbi protiv korupcije, efikasnijim, bržim i kvalitetnijim procesuranjem ovih krivičnih djela.

Tokom cijele godine sudije su po rasporedu dežurale u predmetima hitne prirode te su mimo predmeta koji su obuhvaćeni planom, rješavani brojni predmeti kod kojih je hitnost u rješavanju prioritetna (KPP, KV, K i KPS pritvorski predmeti), a nisu obuhvaćeni Planom rješavanja predmeta.

Izvršno odjeljenje (Ostvarena norma 119,4%)

Programom rada Općinskog suda u Sarajevu za 2021. godinu, planirano je da 26 sudija Izvršnog odjeljenja, u postupcima koji su pokrenuti na osnovu izvršne i vjerodostojne isprave-mjenice, riješi 15.427 predmeta, sa normom od 605 predmeta po sudiji.

Tokom izvještajnog perioda, od 01.01. do 31.12.2021. godine, na Izvršnom odjeljenju je zbog odsustva jedne sudije postupalo 25 sudija, a koji su riješili više od planiranog broja predmeta i to 16.259, čime je, kada se ima u vidu da je zaprimljeno 14.238 predmeta, savladan priliv predmeta na ovom odjeljenju tako da je na kraju izvještajnog perioda na nivou odjeljenja ostalo neriješenih 15.609 predmeta, a što je značajna razlika u smanjenju broja predmeta obzirom da je u 2021. godini taj broj iznosio 17.630 predmeta.

Plan rješavanja predmeta ostvaren je u procentu od 71,49%, odnosno od 10.571 predmeta koji su bili obuhvaćeni planom riješeno je 7.505 predmeta, dok je ostvarena norma od 119,4%.

Kao i svake godine, u cilju kvalitetnijeg i efikasnijeg

rješavanja izvršnih predmeta na sastancima odjeljenja posebno je posvećena pažnja ujednačavanju sudske prakse uz saradnju sa Kantonalnim sudom i analizirane su mogućnosti za ostvarenje boljih rezultata rada, sa akcentom na poboljšanje ažurnosti u radu Službe sudskih izvršitelja, a što je sve doprinijelo ostvarenju jako dobrih rezultata ovog odjeljenja. Također, u toku 2021. godine nastavljene su i aktivnosti u okviru Projekta „Unapređenje efikasnosti sudija i odgovornosti sudija i tužilaca u BiH – treća faza“ (Projekt ICEA III) u kojem ovaj sud sudjeluje kao jedan od pilot sudova, a radi unapređenja izvršnog postupka.

Vanparnično odjeljenje (Ostvarena norma 223,54%)

Programom rada Općinskog suda u Sarajevu za 2021. godinu je predviđeno da poslove na Vanparničnom odjeljenju obavlja troje sudija i jedan stručni saradnik. Počev od 01.09.2021. godine na odjeljenje je raspoređen još jedan sudija tako da su poslove na Vanparničnom odjeljenju obavljale četiri sudije i jedan stručni saradnik, pri čemu su prema funkcionalnoj nadležno-

▲ Dragan Mirjanić,
sudija Izvršnog odjeljenja



sti sudije rješavale vanparnične predmeta oznake „V“, te ostavinske predmete oznake „O“ po prijedlozima za raspravljanje naknadno pronađene imovine, dok je stručna saradnica rješavala ostavinske predmete oznake „O“ koji se povjeravaju u rad notarima (povjeravanje spisa notarima, pregledanje spisa vraćenih od notara, arhiviranje), te dio predmeta oznake „V“ (protest mjenice).

Na početku 2021. godine na odjeljenju je bilo 8.560 neriješenih predmeta, tokom godine je zaprimljeno 10.087 predmeta tako da je u radu bilo 18.647 predmeta. Od tog broja u 2021. godine je riješeno ukupno 8.233 predmeta, od kojih je čistih vanparničnih predmeta oznake „V“ riješeno 1.937, ostavinskih predmeta po prijedlozima za donošenje dopunskih rješenja oznake „O“ 726 predmeta, te predmeta oznake „O“ koji su povjereni notarima 5.568, tako da je ostalo neriješeno 10.414 predmeta.

Priliv predmeta u 2021. godini je savladan na „V“ referatu za 102 predmeta više, na sudskom „O“ referatu za 104 predmeta više, dok priliv nije savladan na notarskom „O“ referatu (riješeno manje 2.060 predmeta). Analizom pokazatelja iz 2021. godine u odnosu na 2020. godinu, priliv ukupnog broja predmeta je bio veći za 2.131 predmet, od čega je priliv „V“ predmeta bio veći za 448, a notarskih „O“ predmeta za 1.689, dok je priliv sudskih „O“ predmeta bio manji za osam predmeta. I pored većeg broja zaprimljenih predmeta u odnosu na prethodnu godinu, u 2021. godini je riješeno 2.633 predmeta više.

Vanparnično odjeljenje je i pored povećanog priliva predmeta ostvarilo godišnju normu od 223,54 % što je za 57,61% više u odnosu na prethodnu godinu.

Na početku 2021. godine notarima je bilo povjereni u rad 6.737 predmeta iz prethodnih godina, u toku 2021. godine im je povjereni 7.628 predmeta, riješili su 5.568 predmeta, tako da je u radu ostalo 8.797 predmeta, što je više u odnosu na početak ovog izvještajnog perioda.

Potrebno je istaći da se na Vanparničnom odjeljenju rješavaju predmeti oznake „V“ koji se odnose na uređenja ličnih stanja, zadržavanja duševno bolesnih osoba u zdravstvenoj ustanovi, proglašenje nestalih osoba za umrle i dokazivanja smrti, oduzimanje i vraćanje poslovne sposobnosti, produženja i prestanka roditeljskog staranja, uređenja međa, razvrgnuća suvlasništva, ispravke imena u zemljišnim knjigama koji su po svojoj prirodi hitni i dr. koji zahtijevaju postupanje u kratkim rokovima, te maksimalnu angažovanost sudija u radu na istim, rad na terenu, a što zbog potrebe odsustva sudija utiče i na raspoloživo radno vrijeme i rad sudija na ostalim predmetima.

Imajući u vidu da je u prvih osam mjeseci na odje-

ljenje bilo raspoređeno troje sudija, a preostala četiri mjeseca 2021. godine četiri sudije koji su rješavale čiste vanparnične predmete „V“ (stručni saradnici po funkcionalnoj nadležnosti zadužuju samo „O“ predmete), da broj riješenih predmeta od strane notara zavisi od dinamike rada samih notara, da je bio minimalan broj izostanaka sudija i sudskih asistenata kao i odgoda ročišta zbog pandemije virusa Covid-19, a da je Vanparnično odjeljenje u 2021. godini ostvarilo normu od 223,54 %, realizovalo Plan rješavanja starih predmeta od 79,56%, da je kvalitet rada na odjeljenju 85% potvrđenih odluka, to se rad Vanparničnog odjeljenja u 2021. godini može ocijeniti kao izuzetno uspješan.

Prekršajno odjeljenje

(Ostvarena norma 108,82%)

Programom rada Općinskog suda u Sarajevu za 2021. godinu planirano je da na Prekršajnom odjeljenju ovog suda poslove obavlja devet sudija. Međutim, u navedenom periodu se mijenjao broj sudija pa je tako u prvoj polovini izvještajnog perioda 2021. godine bio raspoređen planirani broj sudija, a imenovanjem novih sudija, počev od 14.06.2021. godine, na odjeljenje je raspoređen još jedan sudija, da bi zbog velikog priliva predmeta u referatima sudija, u mjesecu oktobru 2021. na odjeljenje raspoređen još jedan sudija na rad sa pola radnog vremena (član 63. Zakona o radu).

Na početku izvještajnog perioda ukupan broj neriješenih predmeta na ovom odjeljenju je bilo 10.350 (od čega 10.115 Pr predmeta, a 235 Pls predmeta), dok je tokom 2021. godine, zaprimljeno 12.122 predmeta, (od čega 10.272 Pr, a 1850 Pls predmeta) tako da je u radu bilo ukupno 22.472 predmeta (i to 20.387 Pr, a 2.085 Pls). Riješeno je 10.559 predmeta (od čega 9.269 Pr i 1.290 Pls, dok je ostalo neriješenih 11.913 predmeta (11.118 Pr i 795 Pls) te je ostvarena prosječna norma na odjeljenju u visini od 108,82%.

Ako se ima u vidu da je propisana orijentaciona norma na ovom odjeljenju 78 predmeta riješenih u meritumu ili 132 predmeta po ostalim načinima završetka, to navedena norma svjedoči o velikom zalaganju i posvećenosti radu sudija i njihovih asistenata. Tome u prilog govori i činjenica da je usljed pandemije COVID-a19, u toku 2021. godine, veliki broj usmenih pretresa opozvan (posebno u periodu mart-april 2021. godine, shodno odlukama VSTV-a BiH, a radi zaštite zdravlja stanovništva i uposlenika zaposlenih u pravosudnim institucijama), a važeće odredbe procesnog zakonodavstva za meritorno okončanje prekršajnog

postupka podrazumijevaju neposredno prisustvo stranaka u postupku, što je predstavljalo dodatne napore za okončanje navedenih predmeta.

Pored gore navedenog, uspjeh ovog odjeljenja ogleda se i u činjenici da je ostvarena izuzetna realizacija plana rješavanja predmeta u 2021. godini, a koja procentualno iznosi **95,81%**. Također, sudije su blagovremeno odgovorile i u svim predmetima po zahtjevima za izricanje zaštitnih mjera zbog nasilja u porodici, na način da je o ovim zahtjevima odlučeno u skladu sa Zakonom o zaštiti od nasilja u porodici. Osim toga, tokom cijele godine sudije su po rasporedu dežurale u predmetima hitne prirode (na ovom odjeljenju sudije dežuraju 24 sata) te su blagovremeno riješeni svi predmeti koji su zahtijevali hitnost u rješavanju. Ovdje treba posebno istaknuti da su sudije zbog hitnosti prioritarno uzimale u rad i predmete iz oblasti saobraćaja u kojima je prijetila zastara, a koji predmeti se nisu nalazili u Planu rješavanja sudija za 2021. godinu. Sudije su isto tako radile i ostale poslove koji su bitni za ažuriranje referata, a po potrebi sudije su učestvovalе i u vijećima krivičnih predmeta.

Treba istaći da su sudije ovog odjeljenja i pored obimnih referata (oko 1.100 predmeta u referatu sudije) kao i svih naprijed navedenih okolnosti, a koje se prije svega odnose na previsoko postavljenu normu (78 predmeta riješenih u meritumu) ostvarile izuzetne re-

zultate i u pogledu kvaliteta donesenih odluka. Sa drugostepenog suda vraćeno je 628 predmeta po žalbi, od čega **potvrđeno 565**, pozitivno preinačeno **16 predmeta**, dok je ukinuto svega **47 predmeta**. Izraženo u procentima: potvrđenih i pozitivno preinačenih odluka **93,46%**, a **ukinutih 6,54%**.

Za Prekršajno odjeljenje je, pored rješavanja predmeta u redovnom postupku, značajan i referat izvršenja prekršajnih sankcija na kojem je na početku 2021. godine bilo 13.550 Ips predmeta, a tokom izvještajnog perioda zaprimljeno je 6.664 nova predmeta tako da je u radu bilo 20.214 neriješenih predmeta. Od tog broja riješeno je 5.139, dok je neriješenih ostalo 15.075 predmeta. Naplaćeno je 1.303.971,00 KM, što je za 308.612,00 KM više nego u prethodnoj godini. Na referatu izvršenja prekršajnih sankcija uloženi su napori na poboljšanje naplate novčanih kazni te su i pored problema koji se odnose na zakonsku regulativu u ovoj oblasti postignuti dobri rezultati. Međutim, u cilju unapređenja rada ovog referat, a imajući u vidu i njegov značaj u pogledu naplate izrečenih prekršajnih kazni, smatramo da je neophodno da se na ovaj referat rasporedi još dva referenta jer bi se na taj način mogla poboljšati prinudna naplata blokiranjem računa fizičkih, odnosno pravnih lica kako je to propisano zakonom. Treba posebno napomenuti da su sudije i pored obaveze na rješavanju predmeta u redovnom postupku, ažurirale IPS referat u

▲ Sudija Melisa Bandić - Prekršajno odjeljenje



pogledu predmeta u kojima je nastupila zastara izvršenja, kao i predmeta u kojima su se stekli uslovi za arhiviranje. Uzimajući u obzir činjenicu obimnost referata te da ovi predmeti sudijama nisu normirani, to govori o velikim naporima koji se ulažu na ažuriranju referata, kako sudija tako i referenata na ovom odjeljenju. U cilju što boljeg i efikasnijeg rada te podizanja kvaliteta rada Prekršajnog odjeljenja na još veći nivo, smatramo da je potrebno da se ovom odjeljenju dodijeli još dvoje sudija te da se od strane VSTV-a BiH ponovo razmotri orijentaciona norma za ovo odjeljenje jer je propisana norma, meritorno 78 predmeta ili 132 predmeta po ostalim načinima završetka, previsoka i nerealna s obzirom na složenost i trajanje postupka, kao i primjenu odredaba krivičnog zakonodavstva koje se *mutatis mutandis* primjenjuju u prekršajnom postupku, a koje prekršajni postupak u značajnoj mjeri usložnjavaju. Ovo posebno iz razloga što iskustvo sudija pokazuje da se u sve većem broju prekršajnih postupaka okrivljeni koriste svojim pravom da ne prihvataju odgovornost te da se polazeći od pretpostavke nevinosti odgovornost za učinjeni prekršaj dokazuje u izvedenom dokaznom postupku pred sudom.

Potrebno je takođe napomenuti da na Prekršajnom odjeljenju nema nezavršenih predmeta u Pr fazi koji su stariji od pet godina, već samo predmeti koji se vode u IPS fazi (faza izvršenja), obzirom da je Zakonom o prekršajima FBiH propisano da se novčane kazne i troškovi postupka brišu iz Registra novčanih kazni tek po isteku pet godina od kada je prekršajni nalog postao konačan i izvršan ili je rješenje o prekršaju postalo pravomoćno i izvršno.

U toku 2021. godine, na zahtjev stranaka je izvršena provjera u prekršajnoj evidenciji te je urađeno 5.242 uvjerenja o činjenicama iz prekršajne evidencije i po osnovu izdatih uvjerenja naplaćeno 75.985,00 KM sudske takse.

Na kraju treba dodati da su sudije na Prekršajnom odjeljenju svojim maksimalnim zalaganjem postigle i izuzetne rezultate kako u pogledu norme i kvaliteta, tako i u pogledu poštivanja optimalnih i predvidivih rokova.

Odjeljenje registra za upis pravnih lica (Ostvarena norma 159,41%)

U Odjeljenju Registra za upis poslovnih subjekata je u 2021. godini bilo je raspoređeno pet sudija i pet sudskih asistenata s tim da su im podršku radu na pred-



▲ Adela Bejtović Janušić, sudija Odjeljenja registra za upis pravnih lica

metima pružali jedan arhivar i uposlenici pisarne ovog odjela.

U 2021. godini zaprimljeno je 5.402 novih predmeta tako da je sa zaostatkom iz prethodne godine od 650 predmeta u radu bilo ukupno 6.052 predmeta (oznaka Reg i F1). U odnosu na izvještajni period za prethodnu 2020. godinu ukupno je primljeno više 878 predmeta (22%). Od 5.402 novih predmeta u 2021. godini, 1.836 prijava se odnosilo na osnivanja poslovnih subjekata, a što je više za 635 predmeta (53%) u odnosu na 2020. godinu kao i 3.548 predmeta za upis promjena, što je za 225 predmet više (7%) u odnosu na 2020. godinu.

Od ukupno 6.052 predmeta u radu, riješeno je 5.377 predmeta tako da zaostatak na kraju izvještajnog perioda iznosi 675 neriješenih predmeta, odnosno zaostatak je povećan za 25 predmeta (4%). Veoma je važno istaći da je značajan napredak postignut u dužini trajanja vremena registracije po svim prijavama ukupno (urednim i neurednim koje su zaključkom vraćane na uređenje) tako da je sa 16,01 dana u 2020 godini trajanje registracije skraćeno na 12 dana u 2021. Rok za dobijanje poreznog broja kod osnivanja poslovnog subjekta je sa 5,18 dana u 2020. smanjen na 3,10 dana u 2021. Godini. Isto tako registracija je trajala 3,55 dana u predmetima u kojim je uz prijavu podnesena potpuno uredna dokumentacija, što je i kraći rok od pet dana koji je propisan Zakonom za postupanje po

urednim prijavama.

Posebna aktivnost koja se vodi na ovom odjeljenju odnosi se na proces digitalizacije kompletne arhivske građe sudskog registra. Proces je počeo 01.04.2019. godine nastavljen je u 2020. godini i 2021. godini.

Usvojenim izmjenama Zakona o registraciji poslovnih subjekata uvedene su novine u procesu registracije, a najvažnija je da se objavljivanje rješenja o registraciji vrši putem oglasne internet stranice suda, odnosno rješenja se ne objavljuju u službenim novinama, a što je umanjilo troškove suda kao i stranaka u postupku registracije.

U 2022. godini je potrebno raditi na daljem poboljšanju rada ovog odjeljenja i efikasnijem i bržem rješavanju predmeta što se može postići kroz sljedeće aktivnosti:

- uspostaviti potpunu implementaciju procesa digitalizacije arhivske građe;
- urediti i redovno održavati elektronsku oglasnu tablu sudskog registra na kojoj se objavljuju sva rješenja o registraciji;
- prijave rješavati u zakonskim rokovima propisanim za registraciju poslovnih subjekata (tri dana za uzimanje prijave u rad, odnosno pet dana za izdavanje rješenja o registraciji po urednoj prijavi stranke (član 54. i 81. Zakona o registraciji poslovnih su-

bjekata u FBiH);

- inicirati održavanje edukacija sudija, notara, advokata poslovnih subjekata kao učesnika u postupku registracije;
- održavati sastanke odjeljenja na kojim će se pratiti rad svih sudija, a posebno podsticati ujednačavanje prakse;

Imajući u vidu ostvarene rezultate, rad ovog odjeljenja u 2021. godini može se ocijeniti kao veoma uspješan, a što potvrđuje činjenica da su sudije ostvarile normu od 159,41%. Prijave su ažurno uzimane u rad pa nije bilo primjedbi stranaka na dužinu trajanja i kvalitet postupka registracije. Po urednim prijavama proces registracije skraćen je na 3,55 dana (postignut zakonom propisan rok) što je veliki napredak u odnosu na ranije godine.

Zemljišnoknjižni ured

(Ostvarena norma 103%)

Zemljišnoknjižni ured Općinskog suda u Sarajevu je u 2021. godini zaprimio 32.411 DN predmeta, a sa za-



▲ Zk referenti

Tabelarni pregled priliva „Dn“, „Rz“, „Nar“ predmeta i naplaćene sudske takse u Zemljišnoknjižnom odjeljenju Općinskog suda u Sarajevu za period od 2016. do 2021.

Godina	Broj zaprimljenih „Dn“ predmeta	Broj zaprimljenih „Rz i Nar“ predmeta (zk izvaci, historijati zk uložaka, uvjerenja, zamolnice i sl.)	Iznos naplaćene sudske takse u KM
2016.	32.635	98.147	2.740.413
2017.	33.692	119.406	1.284.500
2018.	34.973	132.593	1.435.636
2019.	33.846	132.593	1.568.654
2020.	34.613	9.760	1.096.37.00
2021.	32.411	128.760	1.354.758

ostatkom od 800 predmeta iz prethodne godine ukupno u radu je bilo **33.211 DN** predmeta. Od tog broja urađeno je **31.389** predmeta, tako da je sa 01.01.2022. godine ostalo neurađenih **911 DN** predmeta.

U istom periodu zaprimljeno je **116.059** zahtjeva za izdavanje zemljišnoknjižnih izvadaka, **486** zahtjeva za izdavanje zemljišnoknjižnih izvadaka sa historijatom i 12.215 RZ-ova (raznih zamolnica-obavještenja, uvjerenja, potvrda i sl.) i po svim zahtjevima je uglavnom postupljeno (130 ostalo neurađenih).

Od ukupno 161.171 zahtjeva (DN-ova, RZ-ova i Nar-ova) koji su bili u radu tokom 2021. godine, ostalo je neriješenih **911 Dn-ova** i 130 raznih zahtjeva (Rz-ova). Navedeni podaci su potvrda da je Zk ured Općinskog suda u Sarajevu poboljšao stepen ažurnosti po zahtjevima za upis kao i da je skratio rokove izdavanja Zk izvadaka i zk izvadaka sa historijatom.

Iz priložene tabele evidentan je kontinuitet povećanja obima posla koji ne proizilazi samo zbog povećanog priliva zemljišnoknjižnih predmeta, nego i zbog povećanja drugih segmenata rada Zemljišnoknjižnog odjeljenja, kao što su zamolnice (koje zahtijevaju istraživanje u zemljišnim knjigama, najčešće za banke – istraživanja o imovini dužnika-neplatiša i dr.), izdavanje historijata zemljišnoknjižnih uložaka, potvrda o neposjedovanju nekretnina, kao i ogroman broj zahtjeva za zemljišnoknjižnim izvacima.

U samom tabelarnom izvještaju nisu obuhvaćeni predmeti postupka sistematske uspostave i zamjene zemljišne knjige (Projekat harmonizacije) koji je u toku, a na osnovu Sporazuma o zajedničkoj implementaciji ovih aktivnosti potpisanog od strane Federalne geodetske uprave i Općinskog suda u Sarajevu. Ovim projektom koji finansira Vlada FBiH, a posrednik je Federalna geodetska uprava FBiH, nastoji se usaglasiti zemljišnoknjižno stanje sa katastrima općina koje su ušle dobrovoljno u ovaj projekat.

U toku su pregovori i pripreme za potpisivanje sporazuma između Federalne geodetske uprave i Općin-

skog suda u Sarajevu o nastavku Projekta sistematske uspostave i zamjene zemljišnih knjiga, temeljem kojeg bi se preuzelo u rad novih deset katastarskih općina novog premjera, a po zahtjevu pet (pet) političkih Općina Kantona Sarajevo.

U 2021. godini stranke su, prateći praksu uspostave u projektu harmonizacije, počele podnositi zahtjeve za pojedinačne uspostave ZK uložaka.

U 2021.godini, nastavljene su promjene u sistematizaciji radnih mjesta, koje su u konačnici dovele do bolje ažurnosti u radu na DN predmetima, kao i u radu sa strankama u šalter sali ovog ureda, jer trenutno sa strankama radi osam uposlenika ovog ureda, tj. šest referenata u šalter sali Zk ureda koji rade sa fizičkim i pravnim osobama i dva referenta koji rade sa notarima, advokatima. Navedene promjene su doprinijele da je Zk ured adekvatno odgovorio na povećanje svih zahtjeva stranaka. Zemljišnoknjižni referenti su zbog navedenih promjena manje angažovani na radu sa strankama u šalter sali pa iako je broj referenata smanjen u odnosu na 2020. godinu, savladan je zaoštatak u odnosu na predhodnu godinu.

Zk ured ovog suda je početkom 2021. godine postavio radne ciljeve, a koje je uprkos proglašenju stanja pandemije prouzrokovane virusom Corona, radio u kontinuitetu te je i pored navedene situacije održana ažurnost u pogledu rješavanja raznih vrsta prijedloga/ zahtjeva za upis (zabilježbu, predbilježbu i uknjižbu) kao i ažurnost u pogledu izdavanja zk izvadaka („na licu mjesta“) i zk izvadaka sa historijatom u roku do sedam dana od dana podnošenja zahtjeva.

Pokazatelj kvaliteta rada ovog odjeljenja su odluke Kantonalnog suda u Sarajevu koji je u prošloj godini riješio 344 predmeta po žalbama stranaka na rješenja ovog ureda. Od toga broja je potvrdio 287, a ukinuo i vratio na ponovni postupak svega 57, a što samo po sebi govori o kvalitetu rada ovog ureda, uz napomenu da je na ukupan broj predmeta (preko 35.000) uloženo svega 280 žalbi na odluke ovog odjeljenja.

Odjeljenje za sporove male vrijednosti

(Ostvarena norma 138,69%)

Početkom 2021. godine na Odjeljenje je raspoređeno 26 stručnih saradnika, a od 1. februara i jedan sudija koji je ujedno predsjednik odjeljenja. Sedam upražnjenih pozicija stručnih saradnika popunjeno je 15. februara 2021. godine. Međutim, imenovanjem za sudije, sredinom godine, ponovo su upražnjene tri pozicije stručnih saradnika koje su ostale nepopunjene do kraja godine. Tokom godine je zbog nepopunjenosti, trudničkog bolovanja, porodiljskog odsustva i ostalih bolovanja izgubljeno ukupno 4 godine i 8 mjeseci, odnosno oko 1.176 radnih dana. Zbog toga su izostali rezultati rada 5 stručnih saradnika, odnosno oko 18% norme odjeljenja.

Odjeljenje za sporove male vrijednosti smješteno je izvan sjedišta suda - na Ilidži. Međutim, bez obzira na prostornu udaljenost te činjenicu da je i veliki broj namještenika tokom godine izostajao sa posla zbog bolovanja, uspješno je organizovan rad i svi poslovi su se nesmetano odvijali. Uprkos ograničenim materijalnim sredstvima Suda i prostornim ograničenjima, svim zaposlenicima su obezbijeđeni adekvatni uslovi i potrebna sredstava za rad. U cilju zaštite zdravlja i poboljšanja uslova rada, pored manjih popravki, na



▲ Tijana Čulić, Stručna Saradnica na Mals odjeljenju

odjeljenju su tokom godine okrečene prostorije u kojima borave i rade zaposlenici.

Odjeljenje je ostvarilo kolektivnu normu 138,69 %, a svi stručni saradnici su prebacili normu.

Na nivou Odjeljenja doneseno je ukupno 26.730 odluka na koje se može izjaviti pravni lijek. Sa drugostepenih sudova po žalbi je vraćeno ukupno 747 odluka, od toga je potvrđeno 647, preinačeno 32 i ukinuto 68. Kvalitet odjeljenja u odnosu na ukupan broj odluka na koje se može izjaviti pravni lijek je 99,75%, a u odnosu na broj vraćenih sa drugostepenog suda je 89,49%. Riješeno je ukupno 26.730 predmeta što je za 7.017 predmeta više u odnosu na prethodnu godinu. Smanjen je broj neriješenih predmeta za 7,83%. Na kraju godine ostalo je neriješeno 84.725 predmeta, a od toga je 82,08% neriješenih komunalnih predmeta i 17,92% neriješenih Mal/Mals predmeta. U odnosu na prethodnu godinu ukupan priliv predmeta je manji za 1.139 predmeta i isti je u potpunosti savladan.

Na smanjenje broja neriješenih predmeta djelimično je uticao smanjen priliv komunalnih predmeta, a što je posljedica saradnje Suda sa komunalnim preduzećima, bolja popunjenost stručnih saradnika te činjenica da su određen broj komunalnih predmeta riješile sudije Parničnog odjeljenja i Odjeljenja za radne sporove. Tokom prošle godine Planom rješavanja predmeta bilo je obuhvaćeno 5.486 neriješenih Mal/Mals predmeta starijih od jedne godine (zaključno sa inicijalnim aktom iz jula 2019. godine). Riješeno je 4.831 predmeta što znači da je Plan rješavanja predmeta realizovan sa 88,06%, a realizacija na najstarijim predmetima iz Plana je 82,45%.


Izvršno odjeljenje po vjerodostojnoj ispravi

(Ostvarena norma 964,57%)

Izvršno odjeljenje po vjerodostojnoj ispravi na Grbavici, kao odjeljenje specijalizovano za rad po komunalnim predmetima, imalo je u toku 2021. godine raspoređena tri stručna saradnika za rad po navedenim predmetima.

Na navedenom odjeljenju je, zaključno sa 31.12.2020. godine, bilo ukupno 965.948 neriješenih otvorenih predmeta te je uz godišnji priliv od 125.795 predmeta ukupno u radu u 2021. godini bilo 1.091.743 otvorenih predmeta.

U 2021. godini je iskazano završenim 91.920 predmeta, od kojih je 2.592 **Ip** predmeta i 89.328 **I** predmeta, uz ostvarenu normu odjeljenja od **964,57** pri če-



▲ Stručna Saradnica
Amela Konjhodžić

mu su svi stručni saradnici ostvarili prebačaj norme. Kada se uzme u obzir da je tokom 2020. godine riješeno ukupno 81.581 predmet uz ostvarenu normu od 733,15%, primjetno je da je odjeljenje, uprkos poteškoćama uzrokovanim pandemijom Corona-virusa, u toku 2021. godine ostvarilo značajno poboljšanje u rezultatima, kako po pitanju ukupnog broja riješenih predmeta tako i po pitanju ostvarene norme.

Posebno treba napomenuti da su stručni saradnici, a u skladu sa Planom rada za 2021. godinu, prioritet u radu davali predmetima sa najstarijim inicijalnim aktom te da je u skladu sa tim riješeno preko 10.000 predmeta koji su stariji od 10 godina, kao i to da su se na odjeljenju blagovremeno donosila rješenja po prigovoru i predmeti dostavljali sarajevskom Kantonalnom sudu po izjavljenoj žalbi. U vezi naprijed navedenog, Kantonalni sud je u 2021. godini potvrdio 43 prvostepene odluke pri čemu u izvještajnom periodu nije bilo ni jedne ukinute odluke, a što ukazuje na visok kvalitet odluka koje se donose na Izvršnom odjeljenju po vjerodostojnoj ispravi.

Odjel pisarnice na Izvršnom odjeljenju po vjerodostojnoj ispravi je u toku cijele 2021. godine ostvarivao dnevnu ažurnost unošenja pristiglih dostavnica i podnesaka u Sokop sistem, kao i ažurnost u priprema-

nju pismena za dostavu izvršenica, koja se ogleda u štampanju samih pismena i dostavnica koje stručni saradnici kreiraju. Uzimajući u obzir da se radi o zaista velikom broju kreiranih rješenja i zaključaka, jasno je da Odjel pisarnice uveliko doprinosi radu i efikasnosti samog Odjeljenja.

U toku 2021. godine Odjeljenje nije raspolagalo sa sudskim dostavljačima-kuririma, kao što je to bio slučaj prethodnih godina, te se iz tog razloga sva dostava vršila putem pošte. Imajući u vidu naprijed navedene pokazatelje koji se ogledaju u visokoj normi Odjeljenja, visokom kvalitetu odluka, prebačaju pojedinačnih normi stručnih saradnika, efikasnosti i ažurnosti sudske pisarnice, s pravom se može reći da je rad Izvršnog odjeljenje po vjerodostojnoj ispravi u 2021. godini bio izuzetno dobar te da je potpuno ostvaren Plan rada za 2021. godinu. Takođe, važno je napomenuti da je Izvršno odjeljenje po vjerodostojnoj ispravi učestvovalo u aktivnostima za unapređenje efikasnosti izvršnog postupka, u okviru ICEA III Projekta, gdje je Općinski sud u Sarajevu jedan od pilot sudova za realizaciju navedenog projekta. U sklopu navedenih projektnih aktivnosti predloženo je niz preporuka i smjernica za poboljšanje efikasnosti izvršnog postupka, čija je implementacija predviđena za 2022. godinu.

Iz svega navedenog proizilazi da uposlenici ovog Izvršnog odjeljenja po vjerodostojnoj ispravi imaju profesionalan odnos prema radu, te da se ulažu maksimalni naponi kako bi se ostvarili što bolji rezultati i kako bi se broj predmeta na Odjeljenju smanjio, što u konačnici i jeste glavni cilj Odjeljenja za 2022. godinu.

Odsjek za CMS

Tokom 2021. godine Odsjek za CMS je uradio 108445 intervencija u CMS aplikaciji po zahtjevima korisnika, što je za oko 12% više nego u 2020. godini. Do ovog povećanja je u najvećoj mjeri došlo zbog značajnijeg porasta broja presigniranih predmeta, kao i zbog velikog povećanja broja invalidacija dokumenata, radnji i zadataka pristiglih kroz CMS aplikaciju po zahtjevima korisnika.

Najveći broj zahtjeva korisnika za korekciju/intervenciju, njih 31601, je poslano kroz CMS, što je za oko 33% više nego u 2020. godini. Putem e-maila je urađeno dodatnih 14858 zahtjeva korisnika. Broj proglašenja nevažećim dokumenta, zadatka ili radnji, pokazuje trend značajnog porasta u odnosu na prethodne godine, a razlog za to je veći obim posla usljed popu-

njanja određenog broja upražnjenih mjesta nosilaca pravosudnih funkcija i njihovih asistenata.

Osim toga, CMS administratorice su imale 4898 intervencija pristiglih telefonskim putem. Neke od ovih intervencija su bile realizovane jednostavnim klikom u aplikaciji, dok su druge iziskivale mnogo zahtjevniju analizu i angažman, koji je ponekad trajao i više dana. Tokom čitave godine vršene su provjere ravnomjernosti dodjele predmeta sudijama po odjeljenjima na mjesečnom nivou, a povremeno i češće. Urađen je značajan broj nivelacija predmeta koje su vršene u cilju ujednačavanja broja i starosti predmeta u referatima sudija. Promjena broja nosilaca pravosudnih funkcija u sudu, osim neophodnih presignacija predmeta i podešavanja parametara za dodjelu predmeta, dovodi i do potrebe kreiranja ili usklađivanja njihovih planova rješavanja predmeta. Tri puta su se u toku godine presignirali predmeti između odjeljenja, što je posebno složen postupak jer takve presignacije se ne mogu raditi masovno, nego se predmeti prvo identifikuju, a onda pojedinačno označavaju i presigniraju. Radi toga je broj pojedinačnih presignacija predmeta u 2021. godini je za skoro 4500 (ili oko 85%) veći nego u 2020. godini.

Primjetan je povećan broj promjena u postavkama specijalizacija za dodjelu predmeta u 2021. u poređenju

Komparativni prikaz aktivnosti Odsjeka za CMS u 2020. i 2021. godini

Vrsta Intervencije	Broj radnji u 2021.	Broj radnji u 2020.	Razlika 2021. - 2020.
Invalidacije pristigle kroz CMS / proglašene nevažećim	31.601	23.772	7.829
Intervencije pristigle e-mailom	14.858	12.583	2.275
Intervencija-sugestija putem telefona	4.898	4.413	485
Intervencija na licu mjesta	4	71	-67

Vrsta Intervencije	Broj radnji u 2021.	Broj radnji u 2020.
Podešavanja odsustva sudija i sudskog osoblja	5.409	3.835
Postavke dežurstva - Krivično	921	817
Postavke dežurstva - Prekršajno	471	917
Postavke specijalizacija	11.023	8.163

sa 2020. godinom, što ukazuje na veći broj nivelacija, promjena referata, kao i povećan broj odlazaka i dolazaka sudija i stručnih saradnika u Sud.

U 2021. godini, Odsjek za CMS je nastavio sa intenzivnim aktivnostima vezanim za unapređenje CMS aplikacije, kao i stalnom edukacijom korisnika uvijek kada se za to ukazala potreba.

Tokom godine je na zahtjev korisnika Općinskog suda u Sarajevu dodano u CMS preko 30 novih naziva za sudska pismena, inicijalne dokumente i podneske. Takođe, udovoljeno je i našim zahtjevima za promjenu imena jednog pravnog osnova, dodavanje novog statusa za dokument presude, te dodavanje naziva za dvije nove mjere i sankcije. Uspješno je po našim zahtjevima u CMS dodana i nova vrijednost atributa predmeta, kao i oznaka hitnosti na predmete proizašle iz stečajnog postupka, te vraćen jedan od statusa dokumenta koje je RG za CMS ukinula.

Imajući u vidu količinu posla koju je potrebno svakodnevno uraditi na izdavanjima jedinstvenih pristupnih kodova (JPK) strankama u novim fazama predmeta, prijedlog Općinskog suda u Sarajevu je bio da se JPK u predmetima u kojima se otvara nova faza, automatski prenosi na stranke koje su ih imale u prethodnoj fazi. Ovom zahtjevu je udovoljeno i JPK se, od ove godine, odnosi na predmet, a ne na fazu predmeta što predstavlja značajnu uštedu vremena kako referentima koji rade u Prijemnoj kancelariji, tako i strankama..

Kad je u pitanju unapređenje mogućnosti za presignaciju predmeta, početkom godine je traženo da na ekranu za masovnu presignaciju IKT odjel VSTV-a omogućiti da se automatski označi svaki n-ti predmet. Ovo je bio jedini način da se kod masovne presignacije automatski postigne ravnomjerna starost predmeta, a da se predmeti ne označavaju pojedinačno. Ovom zahtjevu je takođe udovoljeno, tako da se masovne presignacije predmeta od ove godine mogu uraditi ravnomjerno po starosti predmeta.

IKT Odjelu VSTV-a su u toku 2021. godine poslana 254 zahtjeva za neku vrstu asistencije. Broj ovih zahtjeva je za oko 18% (ili 45 zahtjeva) veći u poređenju sa 2020. godinom. Najveći porast se desio u broju zahtjeva za izradu izvještaja za potrebe suda, čiji se broj udvostručio. U 2020. godini smo imali 29 ovih zahtjeva, dok ih je u 2021. godini bilo 59. Ovo znači da je Odsjek za CMS u 59 navrata, prije nego što uradi ono što se traži, morao tražiti izvještaj od IKT odjela VSTV-a, a to značajno usporava i otežava posao.

Veliki procenat od ukupnog broja zahtjeva za asistenciju na godišnjem nivou, gotovo 25%, se odnosio na izvještaje za potrebe suda. Takođe, značajan je i broj zahtjeva korisnika za unapređenje CMS aplikacije, kojih je bilo 40 ili 16%. U 2021. godini došlo do pora-

sta broja neodgovorenih zahtjeva za asistenciju kroz aplikaciju Service Desk, sa 3 na 14 neodgovorenih zahtjeva.

U toku 2021. godine je primljeno 208 zahtjeva stranaka za slobodan pristup informacijama, što je za oko 50 zahtjeva više nego u 2020. godini. Na nivou Suda su riješena 204 zahtjeva, dok je za 4 zahtjeva morala biti tražena asistencija IKT odjela VSTV-a.

U 2022. godini Odsjek za CMS planira nastaviti dobru saradnju sa korisnicima CMS sistema i aktivnosti vezane za unapređenje i olakšanje njihovog rada.

IKT odsjek

U izvještajnom periodu Odsjek za IKT radio je u kapacitetu kao i svi ostali odsjeci. Na početku mjeseca u dežuri je bio jedan uposlenik, međutim popuštanjem sigurnosnih mjera i povećana posla usljed dolaska ostalih radnika na sudskim referatima u ostalim sedmicama mjeseca maja 2021. Godine u dežuri su bila po dva uposlenika. Rad sa udaljene lokacije obavljao se konstantno.

Izvršavane su redovne obaveze od pripremanja radnih naloga kolegicama koje su radile u šalter-sali na skeniranjima pa do zamjene računara i printera, otklanjanja grešaka na sistemu itd.

Uposlenik koji radi na rasporedu suđenja imao je više obaveza obzirom da su počela suđenja u sudnicama te je i više puta dolazio u dežuru.

U periodu dežure obavljani su svi poslovi i zadaci iz djelokruga rada. Također su uspostavljeni direktni brojevi u pisarnicama i jedan za ZK, urađeno ažuriranje Službenih novina te svakodnevno azuriranje web stranice suda. Postavljeni su posebne cjeline za oglase (Stečaj i Registar).

Cjelokupni IT sistem radio je u punom kapacitetu sa zanemarujući padom sistema na pojedinim mrežnim switchovima.

1. Izvršeno je 4.420 intervencija na poziv korisnika (17,6)
2. Izvršeno pravljenje sigurnosnih kopija podataka 5/7 puta za file server
3. Servisirano 85 printera u servisu
4. Servisirano je 16 skenera u servisu
5. Korekcija i adaptacija 990 prijava za registar poslovnih subjekata
6. Izvršeno je 1.718 audio-video snimaka suđenja,
7. Izdato 1.718 CD sa video-audio zapisima suđenja,
8. **Odjeljenje Grbavica:** Sistem uredno radi. Kratko-



▲ Elvir Kurić, šef IKT odsjeka

trajni prekidi u saobraćaju usljed nestabilnog vremena.

9. **Odjeljenje Ilidža:** Stanje uredno, sistem radi. Pristup kamerama iz zgrade suda omogućen i dozvoljen za sudsku policiju. Odjeljenje se pokriva sa 8 kamera. Sistem u potpunosti funkcionalan.
10. **Arhiv Dobrinja:** Backup tabele i sql baze. Pravljenje sigurnosnih kopija podataka servera e-Arhiv (7). Izvršeno brisanje tabela za otpis po kategorijama i vremenskom razdoblju. Konstantna adaptacija i prilagođavanje potrebama rada na referatu.
11. **Odjeljenje ZK:** stanje uredno. Pravljenje sigurnosnih kopija podataka servera e-Grunt (7). Izvršen upgrade na windows 10 svih računara u ZK.
12. Izvršen unos novih i konfigurisan ulaz kartica u Kodeks. Redovni unos spiskova sa portirnice za zaboravljene kartice. Server za kontrolu ulaza izlaza promijenjen i uveden Kodeks. Pravljenje izvještaja za pojedine referente na mjesečnoj osnovi.
13. Redovna kontrola 11 komunikacijskih ormara
14. Redovna kontrola i održavanje 9 servera
15. Otvorene 3 nove fiksne linije. Tarifni sistem sa ograničenjem po lokalima uveden.
16. Svakodnevno ažuriranje web stranice suda.
17. Upućen zahtjev za regulisanje statusa dodatnih poslova na mjestu Tehničara za raspored sudnica a sve zbog obaveza i poslova koji su u nadležnosti drugog suda.
18. Godinama IKT odsjek radi sa manjkom ljudi, pokrivajući vrlo zahtjevno radno mjesto audio video tehničara. Ulaskom u 2022. godinu IKT odsjek radi smanjenim kapacitetu jer je otišao jedan uposlenik IKT osjeka. Trenutno nepopunjena dva radna mjesta.
19. Obezbjedena ponuda za postavljanje kontrole radnog vremena na Grbavici cca 1.200 KM
20. Kontinuirana podrška na projektu skeniranja za registar (konfigurisanje mreže, radnih stanica i servera)
21. Pripremljena i završena sva dokumentacije i ostali akti u skladu sa PIS Politikom sigurnosti IKT sistema, a nakon nalaza revizije. Potrebno imenovati Službenika za informacionu sigurnost, po preporuci IKT VSTV-a BiH.
22. Periodični pristup bazi računa Centralne banke po zahtjevu predmetnih sudija za provjeru računa klijenata. Izvršena je provjera za 170 bankovnih računa.
23. Izvršeno licenciranje 75% uredskih paketa u sudu sa licencom za Microsoft Office 2016.
24. Izvršena je priprema opreme za otpis. Oprema je otpisana prema standardnim procedurama.
25. Urađena provjera opreme u sudnicama od strane ovlaštenih servisera AVC. Testirana oprema je is-

pravna i funkcionalna. Sve sudnice su opremljene opremom za audio snimanje. U sudnicama u kojima je bilo potrebe obnovljene su audio karte. Sva opreme funkcionalna.

26. Za predstojeću godinu potrebno obezbjediti 50 novih računara i printera.

Pobrojane aktivnosti obavljalo je pet IKT službenika te službenik za raspored sudnica.

Odsjek za kurirske poslove

U protekloj 2021 god. u Odsjeku za kurirske poslove postavljeni su ciljevi i zadaci na samom početku godine. S obzirom da je pandemija uzrokovana Covid -19 virusom još uvijek bila na snazi, rad je morao biti organizovan tako da se strogo vodilo računa prvenstveno o zdravlju uposlenika u samoj službi. Slijedeći upute dostavljene iz uprave Suda, uspješno je realizovan veći dio postavljenih ciljeva.

I pored toga što je od 01. Aprila 2021. Godine u Odsjeku radilo osam kurira, uspješno je razduženo 126.018 pismena. Prethodna godina je uspješno završena uz minimalne zaostatke.

Odsjek sudskih izvršitelja

U toku 2021.godine, Odsjek je zaprimio 9.175 naloga po rješenjima o izvršenju.

Sudijama je vraćeno 7.275 naloga po rješenjima o izvršenju.

Na kraju 2021. godine, ostalo je 1.870 neriješenih naloga po rješenjima o izvršenju.

Složenije radnje provedene u protekloj godini:

- 123 deložacije,
- 10 ometanja posjeda,
- 23 privremenih mjera,
- 105 okvirmih zakona o zalozima
- Provedeno je 198 javnih Prodaja

Odsjek sudskih izvršitelja je usvojio novi sistem rada prema utvrđenom rasporedu za 2022. godinu, gdje svaki sudski izvršitelj provodi izvršne naloge u okviru referata 1 do 3 izvršne sudije.

Komunikacija na relaciji izvršni sudija-sudski izvršitelj je dodatno unaprijeđena, te je protok informacija brži i kvalitetniji.

Uspostavljen je „Call centar“ za sve stranke koje zbog opravdanih razloga; a prvenstveno zbog velikog broja



▲ Adis Omerhodžić,
Šef Odsjeka za kurirske poslove

izvršenika koji se nalaze u izolaciji zbog Covid19; nisu u mogućnosti pristupiti prostorijama Suda.

U toku 2022. godine će se provoditi mnogobrojne aktivnosti koje za cilj imaju unapređenje kvaliteta rada sudskih izvršitelja.

Blagovremenim i precizno definisanim smjernicama za rad Odsjeka u 2022. godini, definisan je detaljan plan kao i konkretni radni ciljevi, a čiji zadatak je efikasnija iskorisćenost radnog vremena i radnog učinka, kao i ažurnost u postupanju po predmetima, a sve putem detaljnih izvještaja.

Saradnja sa sudijama izvršnog odjela putem predsjednika Izvršnog odjela je na visokom nivou, te se uzajamnim planiranjem radnih ciljeva definisalo postupanje po prioritetnim radnim zadacima.

Odsjek sudskih izvršitelja, u raspoloživim kapacitetima, spreman je da:

- brzo i efikasno postupaju po predmetima starijeg datuma zaprimanja
- organizuje radne akcije po ukazanoj potrebi
- planira postupanje po predmetima u objektivnim rokovima
- po potrebi organizuje asistenciju sudske policije i ostalih neophodnih institucija čija podrška na terenu je neophodna.

Prilikom ocjenjivanja uposlenika Odsjeka sudskih izvršitelja za 2021. godinu; isti su upoznati sa definisanim ciljevima za 2022. godinu i to:

1. Postupanje po urgentnim predmetima

Rok za postupanje po urgentnim predmetima je 30 dana od dana zaprimanja predmeta. Prekoračeni rokovi će biti evidentirani.

2. Sedmični radni učinak/radna efikasnost

Sedmični minimalni broj provedenih izvršenih radnji je 12; a što će biti evidentirano sedmičnim izvještajem, koji je detaljno opisan Planom i programom rada za 2021. godinu, a koji se dostavlja, obavezno, najkasnije prvi radni dan u narednoj sedmici.

3. Tromjesečni izvještaj o brojnom stanju/kontrola referata

Svi uposlenici Odsjeka su dužni voditi evidenciju o stanju svojih referata. Na tromjesečnom nivou potrebno je dostaviti tačno brojno stanje predmeta u referatu. (najkasnije 31. mart; 30. juni; 30. septembar; 31. decembar).

4. Pljenidbeni popisi

Na mjesečnom nivou potrebno je provesti najmanje



5 izvršnih radnji u kojima je izvršen popis pokretnih stvari.

5. Ostali radni zadaci

Ostali radni zadaci koji će se po potrebi, naknadno definisati a prezentovati će se blagovremeno uposlenicima Odsjeka i direktno nadređenima.


Odsjek sudskih izvršitelja broji 14 uposlenika i to:

- Šef Odsjeka sudskih izvršitelja
- Dva uposlenika na poziciji administrativno-tehničkih poslova
- 11 sudskih izvršitelja

Odsjek sudskih izvršitelja je organizovan tako da sudski izvršitelji koji obavljaju poslove na terenu, imaju obavezu evidencije svog rada putem dnevnih i sedmičnih izvještaja, a na osnovu kojih se prati ažurnost i efikasnost u radu te formiraju mjesečni izvještaji.

Neophodnu podršku na terenu pružaju uposlenici čiji zadatak se odnosi primarno na obavljanje administrativno tehničkih poslova za potrebe Odsjeka, te osim navedenog zadatka obavljaju i sve ostale radne zadatke a koji se odnose na zaprimanje, kontrolu i raspodjelu pristiglih izvršnih naloga od strane postupajućih sudija kao i ažuriranje baze podataka. U protekloj 2021. godini formirane su dvije baze podataka koje za cilj imaju detaljnu analitiku o kretanju predmeta od trenutka zaprimanja u Odsjek.

Prosječna godišnja norma Odsjeka sudskih izvršitelja za 2021. Godinu iznosi 66,31%, dok je tokom izvještajnog perioda ukupan broj predmeta iznosio 7.275. ■



Općinski sud u Sarajevu

Protok predmeta u 2021. godini

Vrsta predmeta	Broj neriješenih predmeta na početku perioda I	Broj primljenih predmeta tokom izvještajnog perioda II	Ukupan broj svih predmeta u radu III = I+II	Broj predmeta koji su riješeni u izvještajnom periodu IV	Broj neriješenih predmeta V = III-IV
----------------	---	---	--	---	---

Parnično odjeljenje - (15 sudija) - prosjek 259 predmeta po referatu - bilo 3000

P	3.775	3.445	7.220	3.348	3.872
Radni	11	23	34	21	13
Ukupno	3.786	3.468	7.254	3.369	3.885

Radno odjeljenje - (12 sudija) - prosjek 148 predmeta po referatu - bilo 3000

P	400	246	646	243	403
Radni	1.951	1.278	3.229	1.857	1.372
Ukupno	2.351	1.524	3.875	2.100	1.775

Porodično odjeljenje - (4 sudija) - prosjek 167 predmeta po referatu - bilo 2974

P-Rs	0	0	0	0	0
Porodični	715	892	1.607	940	667
Ukupno	715	892	1.607	940	667

Privredno odjeljenje - (10 sudija) - prosjek 156 predmeta po referatu - bilo 3122

Ps	1.337	1.121	2.458	1.287	1.171
L	221	218	439	267	172
St	244	112	356	136	220
Ukupno	1.802	1.451	3.253	1.690	1.563

Krivično odjeljenje - (13 sudija) - prosjek 100 predmeta po referatu - bilo 545

K	606	852	1.458	934	524
K-Mpom	5	23	28	21	7
Kpp	49	3.900	3.949	3.866	83
Kps	351	1.240	1.591	981	610
Km	4	52	56	35	21
Kmv	1	47	48	48	0
Kv	30	1.905	1.935	1.881	54
Ukupno	1.046	8.019	9.065	7.766	1.299

IKS	114	371	485	376	109
-----	-----	-----	-----	-----	-----

Izvršno odjeljenje - "I - Ip" - (25 sudija - 1 str. sar.) - prosjek 624 pred./ref. - bilo 60.000

I	6.608	8.273	14.881	8.361	6.520
Ip	1.046	1.431	2.477	1.272	1.205
POM	28	15	43	26	17
I-kom	5.386	1.184	6.570	3.034	3.536
Ip-kom	413	199	612	295	317
Mal-I-Ip	4.149	3.136	7.285	3.271	4.014
Ukupno	17.630	14.238	31.868	16.259	15.609

Vanparnično odjeljenje - (4 sudija + 1 str.s. V ref.) - prosjek 206 pred./ref. - bilo 3.008

V	1.134	1.835	2.969	1.937	1.032
O	687	622	1.309	726	583
O - notari	6.737	7.628	14.365	5.568	8.797
Ostalo*	2	2	4	2	2
Ukupno	8.560	10.087	18.647	8.233	10.414

Prekršajno odjeljenje - (11 sudija) - 1.083 prosjek pred./ref. - bilo 4.000

Pr	10.115	10.272	20.387	9.269	11.118
Pls	235	1.850	2.085	1.290	795
Ukupno	10.350	12.122	22.472	10.559	11.913

Registar - (5 sudija) - prosjek 135 predmeta po referatu - bilo 562

Registracija poslovnih subjekata	650	5.402	6.052	5.377	675
----------------------------------	-----	-------	-------	-------	-----

Zk referat - (26 referenata) - prosjek 35 predmeta po referatu - bilo 4.200

ZK predmeti	800	32.431	33.231	32.320	911
-------------	-----	--------	--------	--------	-----

Odjeljenje za sporove male vrijednosti - (pred. odjeljenja + 24 str.sar.) - prosjek 3.389

Mal-kom	70.244	11.100	81.344	19.022	62.322
Mal	10.736	4.851	15.587	4.325	11.262
Mals-kom	6.817	1.905	8.722	1.487	7.235
Mals	4.141	1.674	5.815	1.904	3.911
POM	5	0	5	1	4
Ukupno	91.943	19.530	111.473	26.739	84.734

Izvršno odjeljenje po vjerodostojnim ispravama (3 str.sar.) prosjek 338.280/ref.

I	925.055	121.051	1.046.106	89.328	956.778
Ip	40.893	4.762	45.655	2.592	43.063
Ostalo*	0	0	0	0	0
Ukupno	965.948	125.813	1.091.761	91.920	999.841

Ukupno	1.105.695	235.348	1.341.043	207.648	1.133.395
---------------	------------------	----------------	------------------	----------------	------------------

2021. godina

OD UKUPNO 1.133.395 NERIJEŠENIH PREDMETA, 1.084.575 ILI 95,69% ČINE KOMUNALNI PREDMETI, DOK JE 48.820 ILI 4,31 % STRUKTURNIH PREDMETA

48.820	Struktura
-15.609	Izvršni - struktura
-11.913	Prekršaji
-911	ZK
-675	Registar
-109	Iks-referat
19.603	1,73% - parnica i krivica

2020. godina

OD UKUPNO 1.105.695 NERIJEŠENIH PREDMETA, 1.057.891 ILI 95,68 % ČINE KOMUNALNI PREDMETI, DOK JE 47.804 ILI 4,32 % STRUKTURNIH PREDMETA

47.804	Struktura
-17.630	Izvršni - struktura
-10.350	Prekršaji
-800	ZK
-650	Registar
-114	Iks-referat
18.260	4,32% - parnica i krivica


Struktura neriješenih predmeta na dan 31.12.2021. godine

Norma suda

135,64

Kvalitet odluka

90,89



Ostvarena norma po odjeljenjima:

Odjeljenje	Norma
Parnično	97,83%
Radno	86,71%
Porodično	111,76%
Privredno	163,46%
Krivično	116,10%
Izvršno - "I - Ip"	119,40%
Vanparnično	223,54%
Prekršajno	108,82%
Registracija poslovnih subjekata	159,41%
Odjeljenje za sporove male vrijednosti	138,69%
Izvršno - po vjerodostojnoj ispravi	964,57%
ZK	103,00%
NORMA SUDA	135,64%

Izveštaj o rješavanju po zahtjevima o činjenicama iz sudske evidencije

Vrsta predmeta	Broj neriješenih predmeta na početku perioda	Broj primljenih predmeta tokom izvještajnog perioda	Ukupan broj svih predmeta u radu	Broj predmeta koji su riješeni u izvještajnom periodu	Broj neriješenih predmeta
Su			0		0
Su-M			0		0
Registar privrednih društava-Regz	245	12.040	12.285	12.049	236
Prekršajno odjeljenje (uvjerenja)	0	5.215	5.215	5.215	0
Krivično odjeljenje	0		0	0	0
Stečaj i Likvidacija	0		0	0	0
ZK - Izvodci	0	107.133	107.133	107.133	0
Zk -RZ	0	20.681	20.681	20.598	83
Apostile	0		0		0
Ostalo ("P", rod. i posl. Sposob)	0		0		0
Ukupno	245	145.069	145.314	144.995	319

Općinski sud u Sarajevu

